


T 2259.7/1631



Harvard College Library Imaging Services <http://imaging.harvard.edu>

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

國朝列卿紀卷之三

中書省左右承年表

湯

和
見平章吳元年任左丞

王

溥
江西安仁人元末歸附吳元年任右丞洪武元年兼副詹事三年食祿不署事後卒於京

吳

宏
江西餘干人元末歸附吳元年任左丞尋遷指揮使後卒於京

趙

庸
直隸合肥人元末歸附吳元年任左丞洪武三年封南雄侯後卒於京

楊

憲
山西陽曲人儒士洪武二年任右丞三年改左本年伏誅

汪

廣洋
詳丞相洪武三年任左丞

胡

惟庸
詳丞相洪武四年任左丞

殷

哲
山東膠州人洪武初貢士十二年任左丞本年致仕

哈佛大學漢和
圖書館珍藏印

中書省左右丞行實

湯和詳平章癸卯年任左丞

王溥字 江西饒州府安仁人仕陳友諒為平章守建昌頗

著聲望弟漢名漢二亦為友諒守將 太祖南征嘗命師取建

昌不克歲辛丑正月院判朱亮祖率兵擊溥於饒州之安人港

溥以兵拒戰我師不利六月友諒將李明道寇信州胡大海引

兵來援擊破之擒明道并漢二等十八人因送之朱文忠文忠

令二人招溥復送建康 上命皆仍舊職八月 上帥師討友

諒取江西以為鄉道江州既拔友諒奔走武昌溥遂以九月已

酉朔遣使來降俾仍守建昌已而龍興守臣胡廷瑞亦具書納

款壬寅正月。上至龍興。溥率眾來見。上慰勞之。尋遣率兵取撫州及江西未附諸郡。是年元張昶之來。溥實遣人報於上。甲辰從克武昌。遷資善大夫中書右丞。洪武元年。諸功臣進秩。詔溥兼副詹事。從大將軍克平山東河南燕冀。二年克陝西。屢有戰功。賜文幣七表裏。三年十二月。天下既定。論功行賞。陞河南行省平章。上欲優待之。令食祿而不視事。子孫世襲指揮。同知。十一年定諸臣歲祿之數。刻石官署。溥每歲七百五十石。於官田內給與。與平章李伯昇潘原明祿同。五年五月。溥遣人來言。近督取林木。建昌蛇舌巖。眾見巖上有衣黃衣者。歌曰。龍蟠虎踞。勢岩巖。赤帝重興。勝大朝。八百年終。王氣復重。華從此

繼。唐堯其聲如鐘。歌已忽不見。上曰。明理者非神怪可惑。守正者非讖緯可干。漢之文成武利。足以爲戒。事涉妖妄。豈可信也。後卒於京。龍飛記云。溥以饒信干戈。俶擾奉其母葉氏避兵。貴溪倉卒間。母子相失。凡十八年。葉氏所在不可知。而溥思母亦切。是歲正月。忽夢母若告以所在者。命卜者筮之。其繇辭曰。非巖卽穴。朽骨是藏。及是溥言於帝。帝曰。臣之父晉母葉氏實生臣。溥及弟漢寶而臣不天。父也。棄諸孤蚤。所恃者吾母以長。以教。故臣兄弟稍有成立。而母亡已十八年。微臣無似。獲事陛下。比者推恩褒崇二代。假寵於王氏甚厚。獨念臣去鄉邑日久。倘賜之告。得歸展省丘墓。以伸私情。臣不勝至願。帝爲惻然。

有制與之所以撫諭之者亦至仍命儀曹具祭物給之溥即日回家躬率士卒詣貴溪之桃源山向母舊時避兵之處伐木入山以物色求之不得夜號者三日既乃得其居人吳海能言賊兵逼時夫人病不能行即自投井中死矣溥又披榛棘尋得井在溥哀號益不自勝乃具衣衾棺槨即其地葬之

吳宏字

江西饒州府餘干人仕陳友諒爲江西行省叅政

守餘干至正庚子七月鄱陽院判於光取饒州以其城來附

上命僉院鄧愈往鎮之屢殲友諒舟師威震境內宏深懷疑沮辛丑愈以江南叅政行總制事推誠結納撫以恩信宏大感激會

上親取江州友諒奔武昌遂全城請降

上嘉其誠命招諭龍興

壬寅正月

上至龍興宏率衆來見

上慰勞之遂改愈爲江

西叅政移鎮龍興宏代守饒州尋遣率兵取撫州等郡調守撫州又從征下武昌以功拜中書左丞後遷親軍指揮宏涉獵經史能詩工書奉母至孝見重於士大夫後卒於京

趙庸字老哥直隸廬州府合肥縣人僉院趙伯仲弟也元季兵

亂伯仲集義旅屯巢湖觀望時變會俞廖諸將歸於和陽伯仲

亦率所部舟師及庸來附乙未六月從渡江拔采石克太平丙

申定金陵累立戰功陞僉行樞密院事陳友諒陷太平誘殺安

慶守將趙普勝

上遂克安慶命伯仲守之友諒遣兵復破安

慶伯仲遁走。直至龍江。事聞。上怒曰。主將不能堅守城池。失陷遠遁。宜照失城池誅之。常遇春諍曰。伯仲係渡江勳舊。冀曲赦之。上曰。不依軍法。無以戒後人。竟處以死。令其子孫襲職。庸以兄故。上特授僉院。辛丑。從破安慶。九江。壬寅。下南昌。及分兵取江南諸郡。陞叅知政事。癸卯。四月。陳友諒罄發國中兵圍南昌。期必拔。圍且三月。守將告急。七月丙戌。從。上率諸將往征。既至。友諒解圍出鄱陽。以迎我師。大戰於康郎山。戊子。巳丑。庸與諸將連擊敗之。庚寅。庸及俞通海。廖永忠等。以舟師深入搏擊之。敵兵大敗。庸等還。上勞之曰。今日之捷。諸君之力也。八月。友諒欲自湖口逸去。庸等邀擊之。友諒中流矢。貫睛。及

顛而死。擒其太子善兒。平章姚天祥。其子理奔武昌。復稱帝。九月。上還建康。論功。賜庸金帛。甲辰。從平武昌。回克廬州。拔安豐。乙巳。十月。上以淮東僞吳之藩蔽。命徐達。馮勝等。率步騎。庸與葉高。率舟師。水陸進取。十一月。克海安。十二月。克泰州。丙午。三月。破高郵。四月。下淮安。庸皆有功。八月。從伐張士誠。克昇山水寨。拔舊館。下湖州。并兩浙。西進圍蘇州。與諸將分門而軍。各嚴所部。四面困之。吳元年九月。城破。士誠就縛。師還。上詔庸於戟門。賜采段。表裏各六。陞資善大夫。中書左丞。仍降褒諭。爾等今日之功。無忝古之名將。且謂江南既平。當北定中原。以一天下。十月。從大將徐達。取山東。十一月。克沂州。益都。十二月。

下濟南戊申正月。上卽帝位。改元洪武。諸功臣進秩。詔庸以中書左丞兼太子副詹事。二月克東昌。取棣州。三月克汴梁。四月率步騎自中灣進取河南。又自虎牢關進至河南塔兒灤。元將詹同脫因帖木兒戰敗。將散卒走陝州。遂進營於河南城北門。其行省平章梁王阿魯溫送款軍門。遂克河南。達命庸守之。七月達旣拔關陝。擇將鎮禦。遂班師謀取元都。庸與諸將各領軍衛。分布士馬。渡河。徇取河北州縣。閏七月克衛輝。下彰德。取廣平。至臨清。趨德州。克長蘆。直沽。河西務。通州。八月庚午克元兵。九月克河間。守之大軍。尋下保定。中山。真定。十一月徐達至真定。會常遇春於柳亭。調庸守保定。令收諸未附山寨。十一月

從克太原。二年從下陝西。鳳翔。鞏昌。臨洮。諸郡。走張良弼。降李思齊。五月元將也速兵侵通州。上命庸從常遇春率兵東還。拒之。遂搗永平。敗元將江文靖於錦川。獲士馬以千計。至大寧也。速遁。破開平。元君又北奔。追至北河。俘其宗王三人。及平章鼎住等。凡得軍士萬人。車萬兩。馬三千。牛羊五萬。師還燕。時慶陽未下。上命庸副李文忠率師往應。徐達合攻之。八月癸亥。庸自北平行至太原。聞元兵攻大同。文忠謀於庸曰。吾與若等受命而來。闔外之事。有利於國者。專之可也。今大同受敵甚急。若候進止。豈不失機。庸曰諾。遂由代出。鴈門。至馬邑。適邏騎數千奄至。猝遇我師。與戰。敗之。擒其平章劉帖木。進次白楊門前。

軍已駐營去敵五十里文忠至命遷之復前五里許是元將脫列伯悉銳來攻我師先以兩營誘敵自寅至辰度其饑疲乃分軍爲左右翼奮擊大敗之生擒脫列伯縛於軍門降其衆萬餘獲馬疋輜重無筭遂進兵東勝州莽哥倉而還先是元主北走屯蓋里命脫列伯孔興以重兵攻大同欲圖恢復當是時脫列伯被擒孔興走綏德其部將復斬之來降元主知事不濟無復南向未幾慶陽亦平十二月上大賞平定中原諸將謂左丞趙庸從大將軍克山東河南燕冀秦晉等處州郡又從開平王白陝西復取上都後元副將軍同平章李文忠總兵山西應接大將軍乘勝勦捕生擒脫列伯驗其功勞賞白金二百兩文幣

十九表裏三年正月同文忠領兵征伐二月師出野狐嶺降其守將進師察罕懽兒擒其平章祝真三月甲午同文忠敗元太尉蠻子平章沙不丁朶兒只八剌等於白海子之駱駝山遂進次開平獲元平章上都罕等五月十五日同文忠率師北至應昌克其城獲元君之孫買的里八剌及后妃宮女金寶玉冊省院諸官知元君於四月二十八日以疾歿太子愛猷識理達臘以數騎北奔追之不及而還又至苦脫孫追太尉蠻子及奧魯擒元平章伯答兒獲馬駝無筭過中興擒元將江唐國公進攻紅羅山擁兵自固者皆請降大軍所至朔廷遂空十一月師還京丙申大封功臣上諭諸將曰今日定功行封皆至公而無

私如趙庸從平章李文忠取應昌其功不細然有小過止封爲侯乃授開國輔運推誠宣力武臣榮祿大夫柱國同知大都督府事封南雄侯食祿一千五百石令子孫世襲 賜誥命鐵券其文曰朕聞自昔佐興王業之臣有父及其子兄及其弟心實嘉之世常罕見也當朕創業之初師駐和陽爾兄趙伯仲以所部舟師從人來附東渡大江如履平地乃克采石定金陵從征安慶侵其城因非命自却罷職而逝念其初附之誠授爾庸以官督府中書歷任樞要比歲從大將軍下淮東平浙右復任北伐以取齊魯汴洛燕翼秦隴勛績著焉今天下已定論功行賞朕無以報爾是用加爾爵祿使爾子孫世世承襲朕本疎愚皆

遵前代哲王之典禮茲與爾誓若謀逆不宥其餘若犯死罪爾免二死子免一死以報爾功於戲爾能鑒兄之不謀奮志超羣多建奇功而雲中之捷威聲尤振際遇今時可謂千載之一會尚其益宣勤勞訓及子孫享祿位於永久仍賜文綺及帛二十四疋尋命視都督府事四年伐蜀克歸州李逢春烽火山寨取桑植容美洞攻茅岡覃屋寨平之十四年秋閩南廣東羣盜爲亂勢猖獗 上命庸率師討之十月漳州南靖民亂掠鄉邑庸遣兵擊捕其黨盡平湖州海陽民亂調兵平之擒賊千餘并其家屬二千七十人十一月程鄉盜竊發麾軍破其衆擒賊首偽萬戶饒隆海等一百五十人斬首四十餘級十五年正月討東

筦諸盜凡克寨十二擒賊首二千級招降翁源等縣復業人民三千餘戶進兵攻破石鼓赤嶺等寨擒僞官百餘人其黨潰散由是四會縣滿白沙長岡太冲口山河田陳家坊各處父老迎拜於道庸慰諭而遣之是月龍川河源民自稱李元帥合龍南民作亂卽發兵捕獲賊五百七十餘人閏二月率兵討陽山歸善等縣蠻寇平之又克燈心龍湖龍歸大牛成家塘潭源洞生擒賊首萬戶營長都公少公等數十人斬首千餘級招降二千九十戶事聞命賞將士有功者綺帛各有差三月籍廣州蠻戶萬人爲水軍時蠻人附海島無定居或寇盜故籍而用之十月討平廣東羣盜俘賊首號鏟平王者凡獲賊黨一萬七千八百

五十人賊屬一萬六千餘人斬首八千八百級招降其一萬三千二百六十七戶 詔庸班師至京入見 上慰獎殊至賜綵幣上尊良馬十二月 命山西理軍務賜鈔遣行十六年春巡撫北邊訓練士卒至冬召還洪武二十六年卒庸與伯仲初焉分路揚鏢旣而監兄之覆轍範我馳驅卒以致遠西擊秦關北衝燕壁無不如意至感吳踣漢如出一軌其功烈當與傅穎公廖德慶並驅而爭先若餘將瑣瑣者當之則駑攀驥乘十駕莫及庸之所自立者固卓矣或者不稽其然徒從人妄議其所終不幾於侏儒觀場者乎是故與功者不徇名論人者必考實楊憲字希武山西大原府陽曲縣人初名慈少從父寓江南丙

申年 王師克集慶以儒士錄用留左右叅議憲美姿儀通經史有才辨本年使偽吳張士誠拘留不遣踰年放還除博士廳諮議擢江南行省都事時軍國多事征調日發文書委積憲裁決明敏然深刻猜忌有不足於已輒中傷之出為山東行省郎中庚子年又使方國珍有口才善諭禍福國珍以寧紹台來附還奏稱 旨陞按察使遷中書省叅議癸卯年出為江西行省叅政 命總理饒州軍務召入為司農卿時浙西初平憲以其民富實增其賦畝加為二倍徵其稅民不堪命皆怨之 上不之知有揚州人陳敦禮者善滑稽號憲加賦為擅田吳元年陞中奉大夫叅知政事憲在上左右既久熟於典故市權要寵輕

視同列人莫敢與抗嘗頌 上功德日勸行督責之政 上曰欲使我失人心也不聽與張昶同在中書以昶才出已右構害之昶坐誅自是無憚專恣日甚十月詔定律令命憲為議律官上謂省臣曰法有連坐之條謂侵損傷人者以為鞠獄當恕非大逆不道則罪止及其身先王之政罪不及孥謂弗及嗣忠厚之至也自今民有犯者毋連坐叅政憲對曰先王用刑世輕世重自元政姑息民輕犯法非重治之則犯者益重 上曰民之為惡辟如衣之積垢加澣濯則可以復潔汙染之民以善導之則可以復新夫威以刑戮而使民不敢犯其為法也殘矣洪武元年命兼詹事府丞改今名本年改署河南行省叅政事二年調

山西是年召陞中書省右丞三年遷左丞憲欲盡變中書省凡舊吏一切罷黜更用已所親信欲持權乃創爲一統山河花押示僚吏以觀其從違附已者不次超擢否者去之以示編修陳桎桎賀曰押字大貴所謂只有天在上更無山與齊憲大悅數日奏陞桎翰林待制以奏對敏捷甚爲帝所信任會上欲以憲爲相問於中丞劉基基與憲素厚謂其不可以相曰憲有相才無相器宰相者持心如水以禮義爲權衡而已無與焉今憲不然寧無敗乎又問汪廣洋胡惟庸何如俱對不可相三年李善長病中書無官召汪廣洋爲右丞相憲因劾廣洋陰事免廣洋官又不以爲慊使御史劉炳奏徙之海南上不從又教

炳誣奏刑部侍郎左安善八人罪上覺之下炳獄善長奏憲排陷大臣放肆爲奸上命羣臣按治殺之

汪廣洋詳丞相洪武三年任左丞
胡惟庸詳丞相洪武四年任左丞

殷哲字山東萊州府膠州人洪武初以貢士入大學有才識授翰林應奉歷四川重慶府知府時蹇忠定始從里社師一見器之引充郡學弟子員語其師曰是兒將來遠到非吾所及當成就之十二年任叅知政事改左丞本年致仕

國朝列卿紀卷之四

中書省叅知政事年表

李善長

詳丞相國初
辛丑年任

趙庸

詳左丞國初
壬寅年任

張昶

順天宛平人元末歸附
國初丙午年任尋伏誅

蔡哲

湖廣武昌人元末歸附吳元年任洪
武元年調福建叅政歷侍御史免官

楊憲

詳左丞吳
元年任

傅璘

人元末入仕吳元
年任洪武元年兼詹事府丞

汪廣洋

詳丞相洪武元
年十二月任

劉惟敬

人洪武元年任大理寺卿十二
月陞叅知政事三年三月改廣西叅政

睢稼

人國初舉文學洪武二年任三年改弘文館學士

陳寧

湖廣茶陵人元末府掾洪武二年任歷御史大夫

胡惟庸

詳丞相洪武三年任

丁玉

直隸人元末入仕洪武六年任九年陞右御史大夫

馮冕

河南孟縣人洪武初舉儒士六年任九年改刑部尚書

殷哲

見左丞洪武十二年九月任

中書省叅知政事行實

李善長詳丞相國初辛丑年任

趙庸詳左丞國初壬寅年任

張昶字

順天府宛平縣人仕元為戶部尚書辛丑年來附

江西行省平章王溥遣人報於上命仍其官甲辰年陞中書

右司都事丙午年陞中書省叅知政事外示誠款內懷陰計與

楊憲胡惟庸皆相善昶有才辨智識明敏熟於前代典故凡國

家建制度多出昶手裁決如流事無停滯昶恒自以元臣失節

謂不能無議已者心常怏怏時擴廓帖木兒兵尚強元都未下

昶私語其所親曰吾若得歸元仍不失富貴也間陰使人上書

頌功德勸。上以時娛樂。上以語太史令劉基曰：是欲爲趙高也。基曰：誠如。聖見必有使之者。上不欲窮治，但斥之。焚其書，後復勸。上重刑法，破兼財之家，多陳厲民之術。欲上失人心，陰爲元計。上皆不聽。昶懼不安。時元主謂昶已死，贈昶官謚，擢用其子。會平章李文忠下杭州，以元平章長壽丑的等至京師。上釋之，遣歸元。昶乃陰託長壽丑的奉表於元，且寄書其子詢存亡。會昶臥病，憲往候，偶於昶臥內得書藁，遂奏之。上令大都督府按問，昶書八字於牘曰：身在江南，心思塞北。上始惜其才，猶欲存之。及得其所奏書牘，詞曰：彼叛意決矣，是不可赦，遂伏誅。

蔡哲字思賢，湖廣武昌府武昌縣人。元末仕陳友諒爲御史。壬寅附王師，授江西行省理問，陞右司郎中。命往贛州招諭熊天瑞，天瑞遂遣使入朝。上嘉之，擢中書省叅議。陞叅政。吳元年，改授江西按察司僉事。尋陞浙江行省叅政。本年復入爲中書省叅政。命往四川，報僞夏明昇聘，因挾畫士同往，圖其山川險易以獻。洪武元年，出爲福建行省叅政。臨行諭之曰：君子立身行已，莫先於辨義利。夫義者保身之本，利者敗名之源。常人則惟利是徇，而不知有義。君子則惟義是守，而竟忘乎利。此所以異於常人也。福建地瀕海，民物庶富，番舶往來，私交者衆。往時官吏多爲利怵，陷於罪戾。命卿往，必堅所守，毋蹈其罪。蔡哲

對曰臣以菲薄叨承恩命敢不盡公以報。帝曰公卽無私義之謂也。私卽無公利之謂也。要之公之一字亦未易言。此心如止水明鑑無分毫私意累之。然後揆事度物廓然無滯。若使胸中微有芥蒂卽不得爲公矣。卿宜勉之。哲頓首受命。二年召爲待御史。三年十月以所舉御史犯法爲廷臣所劾坐免官。尋卒。上深惜之。命賜棺歸葬鄉里。

楊憲詳左丞吳元年任。洪武元年兼詹事府丞。

傅瓛字

人初名玳元末入仕留侍左右吳元

年陞中書省叅知政事。本年詔定律令命爲議律官。諭瓛曰汚染之民以善道之則可以復生求生於重典是索魚於釜也及

律令成付按察司巡歷州縣使內外知所遵守。洪武元年正月命兼詹事府丞。二月同左丞相李善長學士陶安進郊社宗廟議。八月京師火。帝謂中書省臣曰近京師四方水旱相仍朕夙夜不遑寧處豈刑罰失中武事未息徭役屢興賦歛不時以致陰陽乖戾而然邪卿等同國休戚宜輔朕修省以消天譴。瓛等對曰古人有言天心仁愛人君則必出災異以譴告之使知變自省。人君遇災而能警懼則天變可弭。今陛下修德省愆憂形於色居高聽卑天實監之。顧臣等待罪宰府有垂調燮貽聖衷憂咎在臣等。帝曰君臣一體苟知謹懼天心方回卿等其盡心力以匡朕之不逮。二年改禮部右侍郎。三年以年老致仕。

汪廣洋詳丞相洪武元年任二年出叅陝西

劉惟敬卽惟謙

人吳元年以才學舉任大理寺少

卿洪武元年擢大理寺卿定律令本年設六部改刑部郎中十
二月遷叅知政事二年改廣西叅政詳刑部尚書

睢稼字

人元末入仕以文學侍左右多所啓

沃擢翰林應奉洪武二年陞中書省叅知政事冬十月十三日
甲戌膏露降於乾清宮後苑蒼松之上光潤如酒凝結如脂又
如珠昉白飴甘彌布松柯馨冽氣達左右勃鬱淋漓薰溼大蘇
丙子日李善長率羣臣稱賀帝曰甘露之降載在往牒然休
咎之徵當以類應朕惡足以致斯卿等爲朕明言之稼對曰聖

人之德上及太清下及太寧中及萬民則膏露呈瑞陛下敬
恭天地輯和人民故天不愛寶使嘉祥徵顯也帝推而不居
三年改弘文館學士餘詳國初侍臣

陳寧字

湖廣長沙府茶陵州人元末爲鎮江小吏以代武

人單師言事

上覽之甚喜召見擢江西行省掾史己亥陞廣

德知府辛丑除樞密院都事癸卯改按察司僉事甲辰陞浙江
按察使己巳拜中書叅議降大倉市舶令洪武元年入爲司農
卿遷兵部尚書二年出爲松江知府陞中書省叅知政事三年
坐事知蘇州府詳右御史大夫

胡惟庸詳丞相洪武三年任

國朝列卿紀
丁玉直隸

人初名國珍元末仕韓林兒爲御史

國初用爲九江知府彭澤山民叛玉聚鄉兵敗之事聞 賜鞍馬以其有武略轉爲指揮更名玉屢立戰功陞都指揮使洪武六年遷中書省叅知政事九年陞右御史大夫十二年轉左詳左御史大夫

馮冕河南懷慶府孟縣人洪武初年以儒士舉授欒城縣丞歷春坊贊善六年陞中書省叅政詳國初刑部尚書

殷哲見左丞洪武十二年任

國朝列卿紀卷之四終

國朝列卿紀卷之五

開國侍臣序

國初稽古右文設翰林院職官以文學承顧問出入侍從因得叅謀議納諫諍其職清而地禁至洪武三年又法唐永徽之制設弘文館學士十三年又法古四輔之義設四輔官至十五年又倣宋殿閣大學士之制設大學士凡一時耆舊乘運而奮或拔自科甲或徵自薦舉或錄自亡國類以所學利見於世故能或翼或從尸天之功云

國朝列卿紀卷之五

弘文館學士年表

胡

鉉

武三年任六年致仕
人薦舉洪

劉

基

浙江青田人薦舉歷御史中
丞洪武三年任尋封誠意伯

羅復仁

江西吉水人歸附洪
武三年任本年致仕

危

素

江西金谿人故元學士承旨
洪武三年任本年謫和州

睢

稼

書省叅政洪武三年任
人薦舉歷中

王本中

舉洪武三年任
人薦

弘文館學士行實

胡鉉字

人洪武三年四月初置弘文館以鉉爲

學士六年賜還鄉

劉基字伯溫浙江青田人年十四入郡庠從師授春秋經人未嘗見其執經誦讀而默識無遺習舉業爲文有奇氣決疑義出人意料凡天文兵法諸書過目洞識其要講性理於復初鄭先生聞濂洛心法卽得其旨歸先生大器之乃謂基父曰吾將以天道無報於善人此子必高公之門矣元至正癸酉舉進士授江西瑞州府高安縣丞揭文安公後斯見之謂魏徵之流而英特過之將來爲濟時器也基在燕京時閱書肆有天文書一

帙因閱之經夕翼日卽背誦如流其人乃大驚欲以書授之基曰已在吾胸中矣無事於書也及丞高安有進賢鄧祥甫者精於天文術數迺以其學授基焉之官以廉節著發奸摘伏不避強禦爲政嚴而有惠小民自以得基爲慈父而豪右數欲陷之時上下咸知其廉平卒莫能害也新昌有人命獄府委基復檢案實得其故殺狀初檢官得罷職罪其家倚蒙古根脚欲中基以復讐江西行省大臣素知基遂辟爲職官掾史以讜直聞後與幕官議事不合遂投劾去隱居力學至是而道益明後爲江浙儒學副提舉爲文省考試官頃之建言監察御史失職事爲臺憲所沮遂移文決去嘗遊西湖有異雲起西北光映湖水中

時魯道原宇文公諒諸同遊者皆以爲慶雲將分韻賦詩基獨縱飲不顧乃大言曰此天子氣也應在金陵十年後有王者起其下我當輔之時杭城猶全盛諸老大駭以爲狂且曰欲累我族滅乎悉去之基獨呼門人沈與京置酒亭上放歌極醉而罷時無能知者惟西蜀趙天澤知其才器以爲諸葛孔明之流嘗作文以期之方谷珍反海上元帥原兒只班被其誘脇省憲復舉爲浙東元帥府都事基卽與元帥納隣哈刺謀築慶元等城賊不敢犯及帖里帖木耳左丞相招諭方寇復辟爲行省都事議收復基建議招捕以爲方氏首亂掠平民殺官吏是兄弟者宜捕斬之餘黨脇從誑誤宜從招安方氏兄弟聞之懼請重賂

基悉却不受。執前議益堅。帖里帖木耳左丞使其兄子省都鎮撫以基所議請於朝。方氏乃悉其賄使人浮海至燕京。省院臺俱納之。准招安授谷珍以官。乃駁其所議以爲傷朝廷好生之仁。且擅作威福。罷帖里帖木耳左丞。輩羈管基於紹興。基發憤慟哭。血嘔數升。欲自殺。家人葉性等力阻之。門人密里沙曰。今是非混淆。豈自經於溝瀆之時耶。且太夫人在堂。將何依乎。遂抱持得不死。因有痰氣疾。是後方氏遂橫莫能制。兩越皆從亂。如歸基在紹興。放浪山水。以詩文自娛。時與好事者遊雲門諸山。皆有記。行省復以都事起基。招安山寇吳成七等。使自募義兵。賊拒命不服者。輒擒誅之。略定其地。復以爲樞密院經歷。與

行院判石抹宜孫守處州。安集本郡。後授行省郎中。經略使李國鳳巡撫江西諸道。採守臣功績奏於朝。時執政者皆右方氏。遂置基軍功不錄。由儒學副提舉格授處州路總管府判。諸將聞是命下。率皆解體。勅書至。基於中庭設香案拜曰。臣不敢負世祖皇帝。今朝廷以此見授。無以宣力矣。乃棄官歸田里。時從義者俱畏方氏殘虐。遂從基居青田山中。乃著郁離子。客或說基曰。今天下擾擾。以公才略據括蒼。併金華。明越可折簡而定。方氏將浮海而避公矣。因畫江守之。此勾踐之業也。舍此不爲。欲悠悠安之乎。基笑曰。吾平生忿方谷珍。張士誠所爲。今用子計。與彼何殊耶。天命將有歸。子姑待之。會太祖下金華。定括

蒼乃大置酒指乾象謂所親曰此天命也豈人力能之耶客聞之遂亡去基決計趨金陵衆疑未決母夫人富氏曰自古衰亂之世不輔真主詎能獲萬全計哉衆乃定或請以兵從基曰天下之事在吾所輔者爾奚以衆爲乃悉以衆付其弟陞俾家人業性朱佑等叅掌之且曰善守境土毋爲方氏所得也勿憂我適總制官孫炎以上命遣使來聘遂由間道詣金陵陳時務十八策上從之會陳友諒入寇獻計者或謀以城降或以鍾山有王氣欲奔據之或欲決死一戰不勝而走未晚也基獨張目不言上召入內基奮擘曰先斬主降議及奔鍾山者乃可破賊爾上曰先生計將安出基曰如臣之計莫若傾府庫關

至誠以固士心且天道後舉者勝宜伏兵伺隙擊之取威制敵以成王業者在此時也上遂用其策乘東風發伏擊之斬獲凡若干萬上以克敵之功賞基悉辭不受中書省設御座將奉小明王以正月朔旦行慶賀禮基大怒罵曰彼牧豎耳奉之何爲獨不拜適上召基遂陳天命所在上大感悟乃定征討之計復將討友諒於九江基曰金星在前火星在後克之必矣上大喜遂攻皖城自昏達旦不拔基以爲宜逕拔江州上遂率軍西上陳氏率其屬走湖廣江州平上使都督馮勝將軍攻城命基授方略基書紙授之使夜半出兵云至某所見某方青雲起卽伏兵頃有黑雲起者卽賊伏也慎勿妄動日中

後黑雲漸薄回與青雲接者此賊歸也卽啣枚躡其後擊之可盡擒衆初莫肯信至夜半詣所指地果有雲起如基言衆以爲神莫敢違竟拔城擒賊而還王漢二以饒信降上命基撫之陳氏洪都守將胡廷美使其子納降請禁止若干事上初有難色基自後踢所坐胡床上意悟許之廷美遂以城降初基聞母富氏喪悲慟欲卽歸上以書慰留之期以成功基不得已遂從征伐至是辭歸上遣禮官伴送累使吊祭恩禮甚隆時苗軍反金華括蒼殺守將胡大海耿再成孫炎等衢州或謀翻城應之守將夏毅懼無所措會基至卽迎入城一夕定之卽發書金處屬縣諭以固守所部遂同邵平章榮諸軍克復處城

擒苗帥賀仁德李佑之處州平基至家營葬事時與所親論

上必當有天下之狀於是鄉里及隣近郡縣翕然心服方氏雖據

溫明三郡其士大夫皆仰基如景星慶雲其小民亦未嘗不懷

其舊德也方氏素畏基名時遣人致書奉禮不敢受使人白於

上上因令基與通問因宣國家威德方氏遂納土入貢上時使

人以書訪軍國事卽條答悉合機宜某年月日赴京道經建德

今嚴州也適張氏入寇時曹國公守建德欲奮擊之基乃使勿

擊曰不出三日賊當自走追而擊之此成擒也比三日黎明其

登城望之曰賊走矣衆見其壁壘旗幟皆如故且聞嚴鼓聲疑

莫敢輕動基趣使疾進兵至則皆空壘擊鼓者乃所掠老幼耳

遂窮追賊至東陽悉擒之以還。基至京時，陳友諒據湖廣，張士誠據浙西，皆未下。眾以爲蘇湖地肥饒，欲先取之。基曰：張士誠自守虜耳，陳友諒居上流，且名號不正，宜先伐之。陳氏旣滅，張氏如囊中物耳。會陳氏復攻洪都，上遂伐陳氏，因大戰彭蠡湖，勝負未決。基密言於上，移軍湖口，期以金木相犯，日決勝。上皆從之。陳氏遂平。上還京，定計取張士誠，因定中原，拓土西北。基密謀居多。上或時至基所，屏人語，移時乃去。雖至親密，莫知其由。命爲太史令。一日，基見日中有黑子，奏曰：東南當失一大將。時叅軍胡深伐福建，果敗沒。他日，基見上，上方欲刑人，基曰：何爲？上語以所夢，基曰：三人頭上有血，是衆字。頭上

有血，以土傅之，乃得土得衆之象。應在夢後三日，當有報至。

上遂留所欲刑之人以待之。三日後，海寧以城降，果如基言。捷至

上大喜，悉以所留人俾基縱之。熒惑守心，羣臣皆震懼。基密奏於

上，宜罪已以回天意。次日，上臨朝，卽以其語諭羣臣，衆心始安。

後大旱，上命訊獄，凡平反出若干人，天應時雨。上大喜，因

奏請宜立法定制。上從之。張士誠平後，張昶欲亂政，乃使人

上書稱誦功德，勸上宜及時爲娛樂。上以示基，基曰：是欲

爲趙高也。上頷之。昶色動，知基得其情也。乃使齊翼巖等伺

察其陰事，未及發，而昶先事受誅。及司天臺災，翼巖因爲書言

之於上，其事多平日基密聞於上。或上使爲之者，翼巖

未之知也書奏。上切責翼巖，斬之。遂治黨與，盡得其與相通謀狀。上適以事責丞相李善長，憲吏凌悅因彈之。基為上言：李公勲舊且能輯和諸將。上曰：是數欲害汝，汝乃為之地耶？汝之忠勲足以任此。基叩頭曰：譬如易柱，必須得大木，然後可。若束小木為之，將速顛覆。以天下之廣，宜求大才勝任者。如臣駑鈍，尤不可爾。上怒，遂解洪武元年正月。上登大寶於南郊，基密奏立軍衛法，外人無知者。尋拜御史臺中丞兼太子贊善，適中丞章溢奏定處州七縣稅糧比宋制，畝加五合。上特命青田縣糧畝止五合起科，餘准所擬。且曰：使劉伯溫鄉里子孫世世為美談也。或言有殺運三十年未除者，基慨然曰：使

我任其責，掃除弊俗，一二年後寬政可復也。上幸鳳陽，使基居守。基志在澄清天下，乃言於上曰：宋元以來寬縱日久，當使紀綱振肅，而後惠政可施也。乃命憲司糾察諸道。基素剛嚴，彈劾無所避。凡中書內府闈人吏胥有犯，即捕治。宦者監工不肅，及府衛舍人奕棋，基啓。皇太子悉寘於法。案劾中書省都事李彬侮法等事，罪當死。丞相李善長素愛彬，乃請緩其事，不聽。遣官齎奏請行在。上從其議，處彬刑。基承旨，斬之。由是與李善長大忤。上回京，李善長愬之。基乃求退。上命歸鄉里。基奏曰：鳳陽雖帝鄉，然非置都之地。王保保雖可取，然未易輕也。願聖明留意焉。遂辭歸。後定西失利，王保保竟走沙漠。上

手詔叙基勲伐且召赴京師同盟勲冊略曰爾從朕於羣雄未定之秋居則匡輔治道動則仰觀天象察列宿之羅布驗日月之光華發蹤指示無征弗克攻皖城拔九江撫饒郡降洪都取武昌平處州爾多力焉至於彭蠡鏖戰砲聲如雷鬼神悲號星日晦冥自旦至暮如是者四爾時在舟中備嘗患難今久而未至朕心慊焉命駕一來朕心良慰比至京師上賚賜甚厚追贈祖父爵皆永嘉郡公累欲進基爵基曰陛下乃天授臣何敢貪天之功聖恩深厚榮顯先人足矣遂固辭不敢當上知其至誠不强也上欲相楊憲基與憲素厚以爲不可上怪之基曰憲有相才無相器夫宰相者持心如水以義理爲權

衡而已無與焉者也今憲不然能無敗乎上曰汪廣洋何如

基曰此器局褊淺觀其人可知曰胡惟庸何如基曰此小犢將儼轅而破犁矣上曰吾之相無踰於先生基曰臣非不自知

但疾惡太深又不耐繁劇爲之且孤大恩天下何患無才願

明主悉心求之如目前諸人臣誠未見其可也上嘗與論兵曰

克敵在兵制兵在將兵無節制則將不任將非其人則兵必敗

是以兩軍之間決生死成敗之際有精兵不如良將基曰臣每

觀廟算初謂未必皆然及摧鋒破敵動若神明臣由是知將之

勝又不若主之勝然陛下不拘古法而勝尤人所難上曰

兵者謀也因敵制勝豈必泥於古哉戰陳之事闔闢奇正頃刻

變化如風雲之無常勢要在通其變爾三年七月授弘文館學士十一月進封誠意伯四年正月賜歸老鄉里二月至家遣長子璉捧表詣闕謝恩是年八月蜀平復遣璉進賀平蜀表頌上仍以文答之八月上使尅期以手書問天象事基悉條答其大意以爲霜雪之後必有陽春今國威已立自宜少濟以寬書奏上悉以付史館其書稿併已前奏請諸稿皆焚之莫能得其詳也初基言於上旣括間有隙地曰淡洋抵福建界之三魁元末頑民負販私鹽因挾方寇以致亂累年民受其害遺俗猶未革宜設巡檢司守之上從之及設司頑民以其地係私產且屬温州界抗拒不服適茗洋逃軍周廣二反溫處

舊吏持府縣事匿不以聞基令長子璉赴京奏其事逕詣上前而不先由中書省時胡惟庸爲左丞掌省事因挾舊忿欲構陷之乃使刑部尚書吳雲林老吏訐基乃謀以基欲求淡洋爲基地弗與則建立司之策以逐其家庶幾可動上聽遂以爲案奏賴上素知基置不問省部逮其長子獄上時已勅璉歸及奏上曰旣歸矣免之基入朝惟引咎自責而已先是楊憲敗後汪廣洋爲丞相未幾而貶廣東乃相惟庸基乃大感嘗謂人曰使吾言不驗蒼生之福也言而驗者其如蒼生何遂憂憤而舊疾愈增洪武八年正月胡丞相以醫來視疾飲其藥二服有物積腹如卷石遂白於上上亦未之省也自是疾遂篤

三月 上以基久不出遣使問之知其不能起也特 御製爲文一通遣使馳驛送鄉里居家一月而薨享年六十五遺文郁離子十卷覆瓿集二十四卷寫情集四卷長子璉集所遺文稿五卷名曰犁眉公集基未薨前數日乃以天文書授使服闋進且戒之曰勿令後人習也復命謹之語次子仲璟曰胡惟庸必敗我欲奉遺表無益也日後 上必思我待有問當密爲我奏其略以爲修德省刑祈天永命且爲政寬猛如循環耳諸形勝要害之地宜與京師聲勢相連絡幸 聖主留意基平生剛毅慷慨有大節每天下安危則義形於色然與人交遊開心見誠坦蕩無間至於義所不直無少假借雖親之者以此而忌之者亦以此惟 上察其至誠任以心膂基亦以爲不世之遇知無不言每遇急難勇氣奮發計畫立就外人莫能測其機累贊上成大功 上嘗臨朝稱之輒逡巡不敢當家居惟飲酒奕棋未嘗自言其功每天象有大變則累日不樂以天下蒼生爲憂喜上天威嚴重惟基抗言直議不以利害怵其中 上亦甚禮之嘗稱爲先生而不名又曰吾子房也廷臣或有過失得譴者密爲救解而免其人或知而詣謝者則拒不納其人不知亦未嘗爲言也居鄉里守義尚節儉多陰德不以富貴驕人初與同郡葉琛胡深章溢金華宋濂同出處有通家之好至於居官任政則各行其志俱以功名顯於世而基與宋公又文章爲當代首稱

四庫全書
國朝文苑
卷之五
四十一

云

傳信錄云京師自夏至秋不再有司禱求不應 太祖曰在京
法司及在外巡撫御史按察司冤枉下人以致天旱遂逮京畿
巡按御史何士弘等至京 命絀於馬房及 諭中書省御史
臺都督府言事次日基言三事一曰出陣亡故軍妻數萬盡令
寡婦營居住陰氣鬱結二工役人死暴露屍骸不收三張士誠
投降頭目不合充軍 太祖曰寡婦聽其嫁人不願者送還鄉
里依親工役人釋放寧家投降頭目免充軍役旬日仍不雨
太祖怒曰劉基着還鄉爲民御史按察司官俱令自駕船隻發汴
梁安置被問官吏赦罪還職後得北方欲用舊人乃謂楊憲曰
發在汴梁御史等官俱係舊人宜盡用之

詞林記云予觀誠意伯集慨然激歎以爲有子房之風及誦
聖祖之言亦曰吾子房也夫子房椎擊沙中何異伯溫之憤方氏
其受天文於鄧祥甫又何異於圯上老人之三略哉漢之元功
大封子房子房願封留足矣乃辟穀導引明哲保身始神黃石
之術終從赤松之遊易曰介如石不終日貞吉何其智也而伯
溫乃徘徊容與雉羅於羅象以齒焚豈其忠於國而弗智於身
耶

遵聞錄云 太祖親征陳友諒大戰於彭蠡湖與伯溫皆在御
舟以觀將卒搏戰伯溫忽躍起大呼 太祖亦驚起疑其作亂

見伯溫雙手麾之連聲呼曰難星過可更舟 太祖聽其言而更之坐未半餉舊舟已爲敵砲擊碎矣後勝負未決伯溫密言於 太祖曰可移軍湖口期以金木相尅日決勝 太祖從之遂平陳氏

楊文懿公曰子房不見詞章玄齡僅辦符檄公勲業造邦文章傳世可謂千古人豪或疑公逮事胡元專門象數何異訾伊尹之屢就恨周公之多才也增

羅復仁字

江西吉水人初從陳友諒爲編修甚見禮遇歲

壬寅

太祖高皇帝兵至九江復仁來降

命侍左右癸卯從

破友諒於鄱陽湖

命齋蠟書招諭臨江袁州諸郡甲辰除中

書省諮議性率直每論事指陳得失無所隱避益親信之及武

昌久圍不下

上以復仁友諒舊臣

令往招諭其子理復仁

至城下號慟不已理怪之使召之入復仁曰今不降大兵且屠城諸民何罪早爲之所則族可保也理由是遂降復招諭江西還爲國子助教以老 賜車出入每宴見 賜坐飲食丙午奉

使山西招諭元將擴廓帖木兒前使多被拘留復仁議論慷慨獨還洪武元年擢編修二年冬齋 詔諭安南命毋侵占城旣

至曉以大義安南王悅服還贈以黃金吉火復仁辭不受歸奏之上多其廉讓適安南使者至仍令持之以歸改翰林檢閱未幾拜弘文館學士屢 召諭事復仁多土音質俚 上以其率

直多見聽納尋乞休。賜大布之衣書曰性雖粗率忠直可嘉。賜爾布衣放歸田里仍賜玉帶名馬鐵柱杖坐墩諸物。上嘗幸其第復仁方操塗具急呼其妻取爨故。上每呼爲老實羅云。

詞林記云馬援有言非惟君擇臣臣亦擇君夫中原鼎沸醜虜羶汗羣雄角力未知鹿死誰手復仁乃能辭其故主翊戴真龍推心置腹直見本真綸綍之褒非溢美也。

危素字大朴江西撫州府金谿人年十五能究五經大旨與同郡葛將曾堅黃暉更相策勵乃從吳沉范梈遊遂知名薦入經筵爲檢討歷陞學士承旨榮祿大夫知制誥奏請加封朱考亭

楊龜山李延平真西山蔡九峯從祀俱從其論。國初徐達收

燕京令故臣咸投告身素與編修黃暉誓死於難有報國寺僧梓者救之乃免而暉竟死矣達乃以素歸。上雅聞素文學仍

命爲侍講學士因進言宋朝諸陵爲元西僧所發以理宗頂骨爲飲器。上聞之惻然曰宋南渡諸君無大失德與元又非世讐旣乘其弱取之何乃縱奸人肆酷如是耶卽命守將吳勉訪索頂骨得之僧廬。命有司厝於京城之南紹興亦以永穆陵圖來獻。命掩瘞故處冬十月時值甘露降宋濂爲頌。上問素

此何徵也素曰王者愛養耆老則甘露降而松栢受之尊賢容衆則竹葦受之今甘露降於松是。陛下養老所致也宜以制

幣冊告 宗廟頒於史館以永休聞尋坐失朝免三年四月起
原官 命素及胡鉉惟稼王大中俱爲弘文館學士鉉告歸素
撰 皇陵碑以獻 上念其老 賜小車免朝謁時從論說經
史質証疑義御史王著等劾素亡國之臣不宜居侍從乃謫居
和州之舍山縣五年二月以疾卒所著有宋史稿元史稿文集
五十篇奏議三卷

詞林記云素仕元秉文衡都樞要學者仰之如星鳳及徐達收
燕薊命仕元者投告身素與編修黃皞約死於難皞死而素背
約馬及至躋顯榮陟清華愧東閣之履聲慘南淝之汗顏自經
於溝瀆而不知恥莊生有言哀莫大於心死素之謂矣

餘冬序錄云危大朴素黃殷士皞皆撫之金谿人少同學問至
正中危任至中書叅知政事翰林學士承者黃翰林侍制洪武
元年八月 天兵定燕都危走所居報恩寺俯身入非寺僧大
梓等挽出之謂曰國史非公莫知公死是死國之史也危由是
不死垂老喪節黃投居賢坊井中從人張午下救負以出爲歔
歔曰君小臣而死社稷耶黃曰齊太史兄弟皆死小官彼何人
哉午終不解還舍置酒殺使家人歌舞爲勸環守至日晏會大
將軍徐達下令勝國之臣俱輸告身黃給午取告身若欲輸官
午喜出及還求弗得亟往視井黃已死午買棺入殮僧梓與營
葬馬危黃事始同而終異如此其墓碑皆宋景濂氏爲銘之危

初爲禮部尚書每陳得失自云吾不畏丞相畏後世史官耳元
亡史存景濂云皆危力也嗚呼危故史官知畏史力能存史然
得罪元史深矣元史初成無直筆其乃來君子之議乎若黃乃
真無媿齊太史者僧梓拯危何如送黃之爲義雖然梓非所責
黃固梓之人也濂作大樸銘多假借詞無乃過乎後世並與銘
殷士者觀之死榮生辱自霄壤矣

睢稼字

人國初入仕任監察御史以文學侍

左右多所啓沃授翰林應奉洪武二年陞中書省叅知政事冬
十月十三日甲戌膏露降於乾清宮後苑蒼松之上丙子日李
善長率羣臣稱賀 帝曰甘露之降載在往諫然休咎之徵當

以類應朕惡足以致斯卿等爲朕明言之稼對曰聖人之德上
及太清下及大寧中及萬民則膏露呈瑞 陛下敬恭天地輯
和人民故天不愛寶使嘉祥徵顯也 帝推而不居三年改弘
文館學士日與劉基羅復仁危素胡鉉王本中同居館中時資
獻納 年致仕

王本中

人薦舉洪武三年任

國朝列卿紀卷之五終

國朝列卿紀卷之六

國初侍臣四輔官年表

安 然 河南祥符人元左丞來附
洪武十三年任十四年卒

王 本 春官兼太子賓客本年犯極刑
洪武十三年任

李 榦 山西絳州人故元編修洪武
十三年任本年調蘇州知府

杜 敷 山西壺關人耆儒洪武十三年
任夏官兼太子賓客本年致仕

李 祐 山西安邑人耆儒洪武十三年
任春官兼太子賓客本年致仕

龔 敷 江西鉛山人者儒洪武十三年任春官兼
太子賓客十四年以疾歸歷國子祭

趙民望 直隸藁城人耆儒洪武十三年任
夏官兼太子賓客十年以老致仕

吳 源 福建莆田人耆儒洪武十三年任夏官
兼太子賓客本年以老歸起國子司業

何顯周

直隸內黃人者儒洪武十五年任本年致仕

國初侍臣四輔官行實

安然字

河南開封府祥符縣人徙居直隸鳳陽府潁州元

季爲山東行省左丞守萊州大軍下山東然率衆歸附洪武元年授起居注轉給事中尋擢山東行省叅政立心平正撫綏勤勞祿止養身餘以給公用二年召還爲工部尚書三年正月奉

命於社稷壇北建祭殿五間又建拜殿五間以備不測風雨祭祀八月建議功臣守墓人戶各以本官封爵品級爲差其合用石碑石獸之數亦令有司依品級成造 上從其議尋詔功臣故

不建享堂墳塋葬具皆自備惟戰沒者官給之五年調河南叅政九月改行省爲布政使司陞浙江布政使十二年陞御史臺

右大夫十三年革左右御史大夫改左中丞夏五月癸巳坐事免官還鄉未幾復召爲四輔官每論事 賜坐多所裨益十四

年秋八月庚申以疾卒年五十八 上念來歸之誠親製文遣

官祭之其略曰爾中土之士當元季從事義旅效力於元及元

運既終我師長驅齊魯是以棄胡歸我其來甚誠朕用爾嘉數

授重位嘗干於法朕特釋之昨爲朝無舊臣復召爾來所望加

誠事朕何其遽以疾終朕思初歸之義以牲醴致奠爾其享之

王本字

人洪武十三年以吏部尚書

范敏薦召至京勅曰朕觀上古君臣必正直無私心同氣合方乃上悅大心下忻地祇致海嶽效靈於是乎經邦論道永安社

稷利濟生民臣亦昌馬朕本布衣遇天更元運偶與羣雄並驅

逢多難遇深艱率英俊自中土渡江東造基於此君天下子庶

民十有二年矣永惟致治必在得人乃訪近臣而求士得爾諸

儒來朝朕甚欲與賢者周旋以安寰宇然知人之道堯舜猶難

苟面從志異無利濟之誠則不惟昊天昭鑒實有孤於朕懷故

勅爾羣儒若志秉忠誠則可交於神明與朕同遊以安天下豈

不偉哉乃以本任春官兼太子賓客既而 上坐武英殿四廡

召見諸儒使各言其志本等對曰爲士者貴幼學壯行然求之

往昔懷致君澤民之志而不遇明主道不行功不立徒湮沒於

世如此人者豈不惜哉今臣等草野愚陋學不足以明道才不

足以經世誤蒙 聖上以儒臣召與圖治道臣等遭遇恩榮誠千載一時慶幸何如若不思報稱是自棄於明時何以稱士上悅故授以是職告於太廟十月勅木等竭力忠誠以感格天心十四年正月命刑官聽兩造之辭果有驗罪正以五刑議定然後入奏既奏錄其所授之旨送四輔官諫院官給事中覆覈無疑然後覆奏行之有疑讞則四輔官封駁之著為令九月 上謂四輔官王本等曰天道福善禍淫不言而見君有德而降祚以應之不德其降災以警之故天之於君猶父之於子子不善而警之安敢不懼蓋謹懼無違猶慮有非常之災若恣肆不戒豈能免當然之責朕與卿等皆當慎之後坐極刑

李幹字

山西平陽府絳州人元翰林院編修改國子監博

士退居於鄉

國朝洪武九年授本州儒學訓導十二年遣

勅召之曰朕卽位十二年夙夜孜孜思得賢才其安天下何期大臣不職朋比為奸雖四凶之罪已誅而求賢之意未稱今御史薦爾博學洽聞特遣使齎符臨召有司禮送至京副朕虛懷至授四輔官十二年調蘇州府知府改國子博士兩聘為考試官後以老致仕

杜敷字

山西潞州府壺關人年十五善屬文勤慎好學精

通易書詩三經元末省院屢辟不起入 國朝洪武十三年以尚書范敏薦其學行特 勅徵之諭曰昔之御宇內者無倖值

無遺賢致時和而世泰蓋由善備耳聰目明之道所以士人者樂從其遊輔之以德間有非哲者處於民上則倖位遺賢亦備矣今朕才踈迷聖道之良宗是致賢隱善匿民未康世未泰今爾博學君子齒有年矣符到若精力有餘則策杖來朝果可作為加以顯爵與朕同遊比至京陛見 上諭曰昔有耕莘者為政社稷永安築巖者在朝君仁民康斯二賢疊出於殷商致君六百年之大業是賢者雖處同出異其忠君濟民之道則一然朕政未施訪近臣而求士召爾等來朝命為四輔官兼太子賓客位列公侯都府之次必欲均調四時德合人天卿等慎之同安盛世及蒞任 上又諭曰受斯重任朕與卿等民生係焉可不重乎且卿等昨為庶民今輔朕以掌民命出類拔萃以顯父母豈不天人交慶於戲慎哉二儀之敬事理無乖心常格神言常履道故茲再諭想宜知悉未幾命敷司夏李二月皆上旬十日每人見 賜坐講論治道 上嘗幸第及累賜珍饌襲衣又嘗賜遊東苑 上親與賡詩後以老病告歸卒於家所著有聯時集

李祐字

山西平陽府安邑縣人以孝行重於鄉為時宿儒

洪武十三年以吏部尚書范敏薦其賢 召授四輔官兼太子

賓客未幾 命祐司春季二月皆中旬十日 太祖論曰古以

三公四輔論道經邦理陰陽順四時然當是時間有陽順陰乖

陰順陽戾者有之是由逆理而使然也且任三公職四輔非數人不居凡數人使居是任豈不善惡半之善雖格天惡能違帝是故人事不齊天亦如之而應此其所以陰陽駁雜也當陰陽駁雜之時所當理者三公四輔家宰既多各無司定節序期其時而究將問誰假使上帝以一賢之善不致斑駁其時則惡人偷光飾已又小人效之所以斑駁其時雖在上帝不得不如是也其天道人事疾如影響爲此也朕今設四輔恐上帝艱分善惡累時序之不常特以四季均職於四輔又以上中下三旬人各司之設若上帝福善禍淫易爲殃着所司者比之混殽豈不利哉特以四輔所司明述於後以驗雨暘時若也祐

同杜敷等侍食殿庭

賜衣三襲後以老疾還鄉甲子丁卯庚

午三科考本布政司鄉試衆稱其得人未幾以疾卒於家

龔敷字文達江西廣信府鉛山縣人學問該博德行敦實洪武

初以明經任府學教授御史葉孟芳高其學行薦至京師十三

年會雷震謹身殿欲調和陰陽拜四輔官兼太子賓客位列公

侯之次論令德合天人以臻至治未幾命司春季三月皆下

旬十日敷同杜敷李祐吳源趙民望並以耆老入侍屢荷眷賚

十四年因春令頗愆遣歸後起博士歷司業祭酒詳國初國子

監祭酒

趙民望字

直隸真定府藁城縣人洪武四年有司以儒士

舉因疾遣歸後遊學山西澤州陵川縣十三年 太祖特賜勅徵之且獎之曰朕惟才疎以致賢隱善匿民未康世未泰爾可策杖來朝與朕同遊比至拜四輔官兼太子賓客未幾勅司夏三月皆下旬十日與杜敷等親侍左右講論治道裨益良多後以老致仕

吳源字性博福建興化府莆田縣人洪武初舉明經授興化府學教授十三年召徵四輔官兼太子賓客司夏季二月皆中旬十日尋以老病告歸十四年起國子司業本年卒於官

何顯周字 [REDACTED] 直隸大名府內黃縣人以文學老成重於鄉洪武十五年以薦舉召為右正言兼右春坊右論德尋進四輔官

賜坐講論治道 賜襲衣 命工圖其像 賜待漏院記及誥命以旌之後以疾致仕

國朝列卿紀卷之六終

國朝列卿紀卷之七

開國侍臣殿閣大學士年表

劉仲質

江西分宜人薦舉歷禮部尚書洪武十五年任華蓋殿大學士本年坐事降御史

吳伯宗

江西金谿人狀元洪武十五年任武英殿大學士十六年降檢討卒

宋訥

直隸滑縣人薦舉洪武十五年任文淵閣大學士十六年陞國子監祭酒

吳沉

浙江金華人薦舉洪武十五年任東閣大學士次年降侍書

鮑恂

浙江崇德人薦舉洪武十五年拜文華殿大學士固辭還鄉

全思誠

直隸松江府上海縣人薦舉洪武十五年拜文華殿大學士固辭還鄉

全銓

浙江安吉人薦舉洪武十五年拜文華殿大學士固辭還鄉

張長年

直隸高郵人薦舉洪武十五年拜文華殿大學士固辭還鄉

朱善

江西豐城人薦舉洪武十八年任文淵閣大學士本年以病還鄉卒

權謹

直隸徐州人永樂中舉孝行洪熙元年拜文華殿大學士本年改通政司左叅議

開國侍臣殿閣大學士行實

劉仲質字文質江西袁州分宜縣人敏而好學博通經典洪武初爲宜春訓導被薦入詞垣奏對稱 旨授文林郎歷遷禮部

尚書十五年四月詔天下通祀孔子增學校及師生廩膳 上

諭質曰孔子明帝王之道以教後世使君君臣臣父父子子綱

常以正彝倫攸叙其功叅於天地今天下郡縣廟學並建而報

祀之禮止行京師未遍天下豈非闕典耶卿與儒臣共定釋奠

禮儀頒之天下令每歲春秋仲月通祀孔子是年十一月戊午

做宋殿閣大學士之制以仲質爲華蓋殿大學士宋訥爲文淵

閣大學士吳伯宗爲武英殿大學士吳沉爲東閣大學士 上

親製誥文賜仲質曰朕閱宋書見尚文之美崇儒之道廓焉且當時諸儒皆以賢德輔景運三百有奇焉今特倣宋制殿閣之名必期近侍有補文並歐蘇爾仲質才頗稱任授以華蓋殿大學士奉議大夫爾往欽哉未幾質坐事降監察御史質爲人篤厚文多質實如其人詞林記誤作邵質不知卽劉仲質云詳國初禮部

吳伯宗名祐以字行江西撫州府金谿人父儀元鄉貢進士伯宗生而岐嶷十歲通舉子業識者奇之歎曰此兒玉光劍氣終不可掩洪武庚戌鄉試辛亥廷試俱第一是時初議開科取士命國子祭酒魏觀博士孫吾與修撰王傑爲讀卷官高皇帝親

製策問略曰古者敷奏以言明試以功漢之賢良宋之制舉得人爲盛今特延于大夫於廷不知古帝王敬天勤民其道何繇伯宗條對稱旨上擢爲第一賜袍笏冠服授承直郎禮部員外郎命與學士宋訥等同修日曆時丞相胡惟庸專橫伯宗性剛直不屈惟庸啣之八年坐貶鳳陽伯宗上疏論時政因指斥胡惟庸罪狀不宜獨任以政恐滋久爲國大蠹辭甚切直上覽其奏卽召還賜襲衣鈔錠奉使安南獲馴象方物以歸獻之改國子助教十二年進講東宮首陳正心誠意之學皇太子嘉納明年改典籍御試以十題命賦詩伯宗援筆立就風格峻整士大稱賞賜織金錦衣十四年遷太常丞不拜

十五年又以為國子司業又不拜忤旨貶陝西金縣教諭行至
淮召還以為檢討拜武英殿大學士十六年冬至弟仲宴為三
河令薦舉不以實坐是復降檢討卒伯宗為人溫厚貞諒而不
苟媵姁故屢獲罪所著有南宮集使文集成均玉堂諸稿

詞林記云喬木之枝風折之殘當衢之蘭物踐之傷若伯宗者
以忤惟庸竟坐貶斥其直氣勁操屢折不回說者以為開科第

人名德俱稱非耶

宋訥字仲敏直隸大名府滑縣人訥博學強記動遵矩度性遲
重不妄言笑登元至正癸卯進士仕鹽山縣令遭世亂隱居求
志入國朝文名益昌洪武二年中書省徵纂修禮樂事竣不仕

而歸十三年徵為國子助教橫經發難擊節廓塞學者如客得
歸嘗同諸儒應制撰諸勅文操筆立就雅稱 上意遂遷翰林

院學士十五年五月 命撰宣聖廟碑文賜衣帽文綺鈔錠秋

七月庚戌 上謂訥曰朕觀尚書至敬授人時嘗歎敬天之事

後世中主猶能知之敬民之事則鮮有知者蓋彼自謂崇高謂
民皆事我者分所當然故威嚴日重而恩禮寢薄所以然者視
民輕故也視民輕則與已不相干而畔渙離散不難矣惟能知
民與已相資則必無慢視之弊故曰可愛非君可畏非民眾非

元后何戴后非眾罔與守邦古之帝王視民何嘗敢輕故致天
下長久者以此而已是月有廣東儒士獻治平策 上覽之謂

訥曰此人不識道理豈有涉數千言而不及用賢天下之大欲
朕一人自理可乎蓋自知而用則所見者狹知賢而用則所及
者廣訥對曰賢才在天下人主豈知之必賴羣臣薦舉然得賢
與否係所舉任何如爾 上曰小人所舉未必爲君子君子所
舉未必爲小人故觀其舉者可知其人賢否矣十一月以訥爲
文淵閣大學士制曰朕觀古今賢者遇君有遲速名譽有先後
昔呂望於渭溪有飛熊之兆而乃典周八百訥年雖高邁特授
是官爾往欽哉未幾以爲國子祭酒詳國初祭酒

吳沉字濬伸浙江金華人故元國子博士師道子也博學有文
累徵爲縣庠訓導辭不就洪武十三年薦授待制十一月甲午

朔 上觀漢紀顧謂沉曰人君理財之道視國如家可也一家
之內父子不異貲其父經營儲蓄未有不爲子計者父子而異
貲家必隳矣君民猶父子也若損民以益君民衣食不給而君
獨富豈有是理哉丁酉 上論持身保業之道又謂沉曰人當
無所不謹事雖微而必慮行雖小而必防不慮於微終貽大患
不防於小終虧大德謹小行而無已者可以成大喜忽細事而
不戒者必至於成大惡常人且然况人君乎沉對曰聖慮及此
誠社稷永安之道 上曰安生於危危生於安安不克慮則能
致危危而克慮則能致安在能謹與否爾 上御奉天門視朝
畢又謂沉曰人君治天下進賢納諫二者真切事也沉曰求之

於古克行者鮮矣是故亂日常多治日常少 上曰使其真知
賢者與治其國何有不好真知諫者在於忠已何有不納惟其
知之不真是以於已難入若誠能好賢則不待招徠而賢者自
至誠能納諫則不待旌賞而諫者必來沉曰 陛下之言及此
國家何幸焉十二年十二月以事降編修十三年六月丁卯復
以爲待制沉薦教授童冀儒士吳慎遣使徵之十四年冬十月
辛酉給事中鄭相奏言尊無二上稱臣於 東宮是並所尊矣
沉駁之曰 東宮國之大本所以繼聖體承天位者也臣子尊
敬之禮胡得而異焉請凡啓事 東宮如舊制 上從之十五
年十一月戊午乃以爲東閣大學士十六年二月 上將享太

廟沉進精誠錄先是 上謂沉曰朕閱古昔聖賢其垂訓立教
大要有三曰敬天曰忠君曰孝親君能敬天臣能忠君子能孝
親則人道立矣然其言散在經傳未易會其要領爾等其以三
事以類編輯至是書成 上覽而善之 命沉撰序三月沉因
講周書至國則罔有立政用儉人 上曰甚矣國家不可有小
人有小人必敗君子故唐虞任禹稷必去四凶魯用仲尼必誅
正卯沉進曰書言去邪勿貳所以深致其戒 上曰國家不幸
有小人如蓄毒藥不急去之必爲身患小人巧於悅上忍於賊
下人君若喜其順已而恣其所爲將無所不至矣沉曰小人中
懷奸邪而言似忠信不可不察 上曰然小人善於逢迎彼知

人主所樂爲者不顧非義乃牽合附會曰是不可不爲人主不樂爲者不顧有益於國家亦牽合附會曰是不必爲此誠國之賊也自古知人固難而知言亦不易八月丙戌以進講後期降侍書尋改博士十九年七月丁丑卒沉富蓄遠覽嘗因奏對誤遷渭源教諭未行改典籍陟大學士考功監劾其怠事降侍讀終博士三仕三已無喜愠人以此多之

鮑恂字仲孚其先嘉興人元至治間始遷崇德之千乘鄉恂沉悟淵穎受易於臨川吳幼清深有所得著大易傳義泰定元統省試第一人至正中由鄉薦授溫州路學正改教婺州州御史劉彥博薦其學有原本爲世儒宗洪武初以明經徵爲文華殿

大學士輔導 皇太子暨皇太孫固辭歸隱與貝瓊結詩社所著有西溪稿云

殿學記云漢高欲立趙王如意留侯乃爲呂后畫策招致四皓以輔翼之矧洪武建極卽創大本堂以教 太子乃蒲輪玄纁聘諸耆儒視古帝王之禮三老五更何如耶不知恂銓長年將何以畀之耶

全思誠字希賢直隸松江上海人博雅宏粹少負文名洪武十五年以耆儒徵授文華殿大學士十六年四月 賜勅致仕其辭曰朕觀古人有志之士雖髮白氣衰心猶不怠故能善其始終垂芳史冊卿懷才抱德志肩古人朕甚嘉焉惜乎年迫衰暮

國朝及明系 卷之七 四百〇六
志雖存而力不能任朕不忍復勞特令卿還鄉里以撫子孫享其奉養不亦悅乎

全銓字  浙江湖州府安吉州人與張長年俱年七十餘禮部主事劉庸薦餘等明經通達治體 遣使徵之銓長年至

上見之甚喜賜坐顧門終日俱 命爲文華殿大學士銓等固辭上曰朕以卿等年高故授此職以輔導太子爾免卿早朝日晏而入不久當從其志庶不負卿等平生所學而鄉里亦有光矣卿何辭焉銓等復固辭翼日俱放還

張長年直隸高郵人見上

殿閣記云粵自商山茹芝冥鴻寥落上下千載數人而已思誠賜勅恂銓被寵龐眉皓首安車蒲輪雖竹帛所書圖畫所傳何以加焉

朱善字備萬江西南昌府豐城縣人少聰穎十歲能文通五經四書大義祖雲洞先生嘗謂人曰吾孫他日必爲令器及壯以經學授徒壬辰兵變隱居鄉里養親教子杜門絕跡以聖賢道學爲己任奉繼母李氏克盡孝道友諒戰爭扶母奔竄十餘日復全人謂孝感所至 高皇平一海內開建學校乃以豐城爲富州州守強憲中南昌守許方俱延至郡庠教有成效以名聞於 朝授郡學教授洪武八年 廷試諸儒善爲首乃除修撰署院事知制誥逾年以奏對失旨謫戍遼東復改典籍放還十

七年 上思用老成驛召善還京以爲待詔七月戊戌 上御東閣謂善等曰人君能以天下之好惡爲好惡則公以天下之智識爲智識則明蓋人之常情多矜己能好言人過君子則不然揚人之善不矜己之善貸人之過不貸己之過又曰萬事不可以耳目察惟虛心以應之萬方不可以智力服惟誠心以待之善嘗奏有國者重世臣有家者重世婚近日禮教弗明婚姻混亂或已聘而見絕或既婚而復離議律不精其禍乃至於此成周之世爲婚姻者不過齊宋陳杞數國而亡故當時稱大國曰伯舅小國曰叔舅世爲婚姻可知也列國之君曹衛陳鄭秦晉莫不皆然降及後世如晉之王謝唐之崔盧潘楊之睦朱陳

之好罔不以世婚爲重今宜弛禁以通人情別族以明世教

上從之十八年 命主考禮闈撤棘之日乃超遷奉議大夫文淵

閣大學士五月辛酉朔 上御華蓋殿命善進讀心咸 上曰

人心道心有倚伏之幾蓋人仁愛之心生則枝害之心息正直之心存則邪詖之心消羞惡之心形則貪鄙之心絕忠慤之心萌則巧僞之心伏故人常持此心不爲情欲所蔽則至公無私自無物我之累矣八月丙辰善復言曰古者人君致治重在任人蓋任衆賢爲耳目則視聽周乎四海任衆知爲計慮則私澤施於萬民今天下太平惟選任賢才宜留聖慮 上曰任人之道當嚴於簡擇簡擇嚴則庸鄙之人不進當專於任使任使專

則苟且之意不行然必賢者乃可以專任之非賢而專任者必
生亂也是任人爲難然人亦有謹始怠終者亦自過於前改於
後者故不能保其始終惟始終如一者其懷忠報國之心堅如
金石安得不任之若匿詐似信懷姦似忠者決不可任也是年
九月忽遭危疾 上遣醫調治其子逢掖請告還豐城卒年七
十有二屬纊正冠危坐舉手加額曰感荷 聖恩無以報也語
畢而絕鄉人見有星如虹墜其舍所著有詩經解頤輯釋史輯
諸書正德間 賜謚文恪

權謹字仲常直隸徐州人十歲喪父哀毀頓絕復甦淇武初薦
知樂安縣清慎平恕其民懷之九載考績遷光祿署丞迎母就

養母疾顛大祈以身代母卒躬

三年有白兔青

蛇馴擾不去有司以聞 太宗

皇太子往南京諸

臣皆獻方物不受至徐州謹以孔門

道統圖獻 特賜留

覽洪熙元年三月拜文華殿大學士閏七月改通政司左叅議
致仕謹質實有操履而文學非其所長又年老故也仍旌其門
曰孝行

國朝列卿紀卷之七終

國朝列卿紀卷之八

內閣諸學士序

夫學士之職非古也漢魏以來秘書 有其職梁武帝於文德
殿內列藏衆書北齊有文林館學士後周有麟趾殿學士皆掌
著述唐自太祖時名儒學士時時召以草制然猶未有名號乾
封以後始召文士元萬碩輩草諸文辭嘗於北門候進止時人
謂之北門學士其館學自武德初置修文館後改名弘文館神
龍初改爲昭文館開元七年復改爲弘文館鳳儀中以館中多
圖籍未詳正委學士校正於是有弘文館學士之職其殿學自
開元初於乾元殿東廊下寫四部書仍令秘書監馬懷素等總

其事於麗正殿安置爲修書使至十二年學士張銳等宴於集仙殿乃改殿名集賢改修書便爲學士於是有集賢殿書院學士之職其翰學自開元初置翰林待詔掌四方表疏批答應和文章既而又以中書務劇文書多壅滯乃選文學之士號翰林供奉與集賢殿學士分掌制詔書勅二十六年又改翰林供奉爲學士別置學士院專內命於是有翰林學士之職其講讀自開元三年命馬懷素褚無量更入侍讀十三年置集賢院侍講學士侍講直學士於是有講讀學士之職宋承唐制昭文集賢兩學士皆宰相兼之其翰林學士無定員資淺者爲直院暫行者爲權直惟真爲翰林學士者職始顯貴可以比肩臺長齊武

政路其講讀學士自咸平二年並置以後或不帶學士但以爲兼官而已大中祥符中又建龍圖閣設直閣學士故天章寶文等閣之類遂以所掌閣呼之於是有閣學士之職又有所謂資政殿大學士者真宗特置以寵王欽若至皇祐元年又詔置觀文殿大學士寵待舊臣於是有大學士之職 國初己亥年置禮賢館命陶安劉基章溢宋濂葉琛王禕等居之甲辰年設起居注乙巳年設太史監吳元年設翰林院俱爲侍臣洪武二年定翰林官制承旨正三品學士從三品侍讀學士正四品侍講學士從四品直學士正五品二年又置弘文館學士改劉基與羅復仁危素胡鉉睢稼王大中居之九年罷不設十四年革承

旨直學士定學士爲正五品講讀學士爲從五品十五年十一月倣宋殿閣大學士之制以劉仲質爲華蓋殿大學士吳伯宗爲武英殿大學士宋訥爲文淵閣大學士吳沉爲東閣大學士十六年禮部主事劉庸薦鮑恂全銓張長年張紳等明經通達治體遣使徵之恂銓長年先至俱命爲文華殿大學士皆辭不拜而全思誠亦以耆儒拜文華殿大學士之職然大學士之職階不過五品特以崇重文儒備顧問而已况國朝監前代壅蔽之禍革中書省罷丞相使政歸六卿分理不相混壓所以垂之祖訓者其嚴而殿閣大學士亦不久設固未有相道之責也 文廟入正大統注意文學士於壬午年肇建內閣於東角門內召

解縉黃淮處其中又選胡廣胡儼楊士奇楊榮金幼孜與之同事雖令講讀纂修與議機務然七人始以翰林史職入直陞講讀等官及 仁廟正值東宮又陞春坊等官以後解縉以罪訕則謫廣西叅議胡儼以國學缺人則推陞祭酒而楊士奇等五人終永樂之世亦官止大學士蓋爲衙門所拘初未有衙門小官大之例至洪熙初年以東宮舊臣特加超擢又添設謹身殿大學士於是楊士奇陞禮部侍郎兼華蓋殿大學士楊榮陞太常寺卿兼謹身殿大學士黃淮陞通政使金幼孜陞戶部侍郎俱兼武英殿大學士楊溥陞太常寺卿仍兼翰林院學士緊後委任日隆置三公三孤之官又加至三孤領尚書職隱然有鈞

衡之重禮與百僚殊矣自此官制一變陳山以左庶子張瑛以洗馬各陞侍郎兼大學士入閣然龍飛殊恩非可爲例亦未有由蒞部事而復入者故正統年間陳循高穀苗衷馬愉曹鼎以學士入張益彭時商輅以修撰入則舊意猶存可攷也自景泰初年俞剛江淵王一寧以侍郎改兼學士入蕭鎡以祭酒陞侍郎兼學士入王文以左都御史陞吏部尚書兼學士入於是天順成化弘治以來由侍郎陞尚書入閣者日久因襲不可復改矣然計資叙遷亦未有陞至尚書已理部事而復入內閣焉者自正德初年逆豎劉瑾用事吏部尚書焦芳首以附瑾取入內閣於是楊廷和由南京戶部尚書入劉宇山吏部尚書入曹元

由兵部尚書入而祖宗官制大壞極矣及逆瑾伏誅而莫之改正者何哉夫罷丞相分任六卿無偏聽獨斷之弊此太祖垂訓立法高出千古者也伯政權必有所屬則設內閣而擬議以成其變化者又成祖勵精求治之初心固並行不悖矣况政歸六部權在人主而內閣叅謀猶不得專制外事歷列聖如一日也使居內閣者仰體聖祖之心輸忠宣力守憲奉法於六部有違失密裁抑之與天下順流而治萬世無弊矣如或陰持宰相之柄使六部稟受風旨而後行於罷丞相置內閣之意不旣盡失矣乎今詳各官年表於後其行實見於事紀其勲德茂著者表爲列傳

國朝列卿紀卷之八

直內閣元輔及同直輔臣年表

洪武三十五年即建文四年六月己巳 成祖文皇帝即位七月初建文淵閣選文學臣解縉等七人人直令講讀纂修與議機務

解縉江西吉水人進士自洪武三十五年七月由翰林待詔陞侍讀入直為元輔歷翰林院學士兼右春坊大學士至永樂四年二月被丘福譖洩易儲出為廣西叅議凡四年後改交趾叅政又被李至剛訕其怨望下詔獄卒

同直黃淮浙江永嘉人進士由中書舍人陞編修進庶子兼侍

讀

同直胡廣江西吉水人狀元由修撰陞侍講進右春坊右庶子兼侍讀

同直楊榮福建建安人進士由編修入進右春坊右諭德兼侍講

同直楊士奇江西泰和人薦舉由王府審理副陞編修入進左春坊左中允

同直金幼孜江西新淦人進士山戶科給事改檢討入進侍講同直胡儼江西南昌人鄉舉由桐城知縣陞檢討入歷左諭德兼侍讀永樂二年出拜國子祭酒後加太子賓客致仕

胡廣自永樂四年二月以右春坊右庶子兼侍讀爲元輔歷文淵閣大學士兼左春坊大學士至永樂十六年五月卒於官凡一十二年零三月贈少師禮部尚書謚文穆

同直黃淮歷翰林院學士永樂十二年閏九月繫錦衣衛獄

同直楊榮永樂六年六月憂去七年正月詔起復歷翰林院學士兼庶子

同直楊士奇歷左春坊大學士兼翰林學士同直金幼孜歷翰林院學士兼諭德

楊榮自永樂十六年五月以翰林院學士爲元輔進文淵閣大學士兼翰林院學士至永樂二十八年八月以楊士奇居首凡

六年零四月

同直金幼孜文淵閣大學士

同直楊士奇仍左春坊大學士永樂二十年九月繫錦衣衛獄尋釋復職

楊士奇自永樂二十二年八月丁巳

仁宗昭皇帝卽位進禮

部左侍郎兼華蓋殿大學士爲元輔歷洪熙宣德正統三朝凡二十一年終少師兵部尚書兼華蓋殿大學士至正統九年三月卒於官贈太師謚文貞

同直楊榮進太常寺卿兼文淵閣大學士歷少師工部尚書兼謹身殿大學士至正統五年二月告允展省七月還朝卒於浙

江杭州武林驛贈太師謚文敏

同直金幼孜進戶部右侍郎兼文淵閣大學士於洪武元年正月憂去尋起復歷太子少保禮部尚書兼武英殿大學士至宣德六年十二月卒於官贈少保謚文靖

同直黃淮釋自獄進通政使兼武英殿大學士仍直文淵閣歷少保戶部尚書兼武英殿大學士於宣德二年八月致仕家居二十餘年卒謚文簡

同直楊溥湖廣石首人進士永樂二十二年八月釋自獄擢翰林院學士入閣洪熙元年正月以太常寺卿兼學士直弘文閣宣德初復還內閣四年十月憂去尋起復直弘文閣至宣德十

年正月以禮部尚書兼學士仍入直

同直張瑛直隸邢臺人鄉舉於宣德元年正月以禮部左侍郎

兼華蓋殿大學士入直二年進禮部尚書兼官如舊至宣德四

年十月出為南京禮部尚書九年八月復召以原官仍入直至

正統元年九月卒於官

同直陳山福建沙縣人鄉舉於宣德元年以戶部尚書兼謹身

殿大學士入直至宣德四年十月以干託外事出教小內使書

九年致仕卒

同直馬愉山東臨朐人狀元由侍講學士於正統五年二月入

直

同直曹鼐直隸寧晉人狀元於正統五年二月以侍講入直九

年正月進龔翰林學士

楊溥自正統九年三月以少保禮部尚書兼武英殿大學士為

元輔至正統十一年七月卒於官凡三年贈太師謚文定

同直曹鼐歷吏部左侍郎兼翰林學士

同直馬愉歷禮部右侍郎兼學士

同直陳循江西泰和人狀元正統九年四月以翰林院學士入

直十年十月進戶部右侍郎兼翰林院學士

同直苗衷直隸定遠人榜眼正統十年十月陞兵部右侍郎兼

侍講學士入閣

同直高穀直隸興化人進士正統十年十月陞工部右侍郎兼侍講學士入閣

曹鼎自正統十一年七月以吏部左侍郎兼翰林院學士為元輔至正統十四年八月扈 英宗睿皇帝征胡沒於土木凡三年贈太傅吏部尚書兼文淵閣大學士謚文忠

同直陳循戶部右侍郎兼學士

同直馬愉禮部右侍郎兼學士至正統十二年九月卒於官贈禮部尚書兼翰林院學士謚襄敏

同直苗衷兵部右侍郎兼侍讀學士

同直高穀工部右侍郎兼侍讀學士

同直張益應天江寧籍直隸吳縣人進士正統十四年正月以侍講學士入直八月扈 駕征胡沒於土木贈翰林院學士謚文僖

陳循自正統十四年八月以戶部尚書兼學士為元輔歷少保兼太子太傅戶部尚書華蓋殿大學士至天順元年正月謫戍遼東凡七年半

同直苗衷進兵部尚書兼翰林院學士至景泰元年八月致仕後卒於家贈少保謚文康

同直高穀進工部尚書兼翰林院學士歷少保兼太子太傅工部尚書謹身殿大學士至天順元年正月致仕後卒於家贈太

保謚文毅

同直彭時江西安福人狀元中修撰於正統十四年九月入閣進侍讀至景泰元年正月憂去服除進太常寺少卿兼侍讀

同直商輅浙江淳安人狀元由修撰於正統十四年九月同入直歷兵部左侍郎兼太常寺卿至天順元年正月削籍

同直江淵四川江津人進士由戶部右侍郎兼翰林院學士於正統十四年十月入直至景泰三年與易儲加大子少師仍兼前職尋以憂去五年起復撫安山東河南尋還京入直七年正月出爲工部尚書至天順元年正月謫戍鐵嶺後石亨敗復其官

同直俞綱浙江嘉善人生員於正統十四年十二月以兵部右侍郎兼翰林院學士入直六月出理兵部事進太子少保兵部左侍郎調南京禮部左侍郎

同直王一寧浙江仙居人進士景泰元年 月以禮部左侍郎兼翰林學士入閣加太子少師至景泰三年七月卒於官贈太子太保禮部尚書謚文通

同直蕭鎡江西泰和人進士以祭酒進戶部右侍郎兼翰林院學士於景泰二年十二月入直歷太子少師戶部尚書兼翰林院學士至天順元年正月削籍

同直王文直隸東鹿人進士由太子太保左都御史改吏部尚

書兼翰林院學士於景泰四年二月入直五月憂去九月起復歷少保兼太子太保吏部尚書謹身殿大學士至天順元年正月死於西市後贈太保謚文愍

徐有貞直隸吳縣人進士天順元年正月由左副都御史與奪門功進兵部尚書兼學士入直四月封武功伯兵部尚書兼華蓋殿大學士掌文淵閣事爲元輔本年六月忤曹吉祥石亨降廣東叅政凡半年尋下獄編金齒爲民

同直許彬山東寧陽人進士以太常寺卿於天順元年正月進禮部右侍郎兼翰林院學士入閣

同直薛瑄山西河津人進士以大理寺卿進禮部右侍郎兼翰林院學士於天順元年正月入直四月進禮部左侍郎仍兼翰林院學士至六月見幾乞致仕

同直李賢河南鄧州人進士於天順元年二月由吏部右侍郎兼學士入直四月進吏部尚書仍兼學士六月同徐有貞忤曹石降福建叅政

李賢自天順元年七月復原官入直爲元輔歷少保吏部尚書兼華蓋殿大學士至成化二年三月憂去五月詔起復十二月卒於官凡十年贈太師謚文達

同直許彬以衰老於天順元年 月改南京禮部左侍郎尋降陝西叅政

國朝及續編 卷之八
同直呂原浙江秀水人榜眼以通政司右叅議兼侍講於天順元年六月入直歷翰林院學士至天順六年八月憂去卒於家贈禮部左侍郎謚文懿

同直岳正順天灤縣人會元探花以左贊善兼修撰於天順元年六月入直至七月忤曹石降欽州同知尋謫戍甘肅後起修撰陞典化知府卒贈太常寺卿

同直彭時以太常寺少卿進兼翰林院學士於天順元年九月仍入直至成化元年進兵部尚書

同直陳文江西廬陵人榜眼以禮部右侍郎兼學士於天順七年二月入直至成化元年三月進禮部尚書

陳文自成化二年十二月為元輔歷太子少保禮部尚書兼文淵閣大學士至成化四年四月卒於官凡一年五月贈少傅謚莊靖

同直彭時進太子太保兼文淵閣大學士

同直劉定之江西永新人會元探花以太常少卿兼侍讀學士於成化二年十二月入直三年八月進工部右侍郎兼學士同直商輅以為民於成化三年二月起復原官兵部左侍郎兼學士仍入直

彭時自成化四年四月為元輔歷少保吏部尚書文淵閣大學士至成化十一年三月卒於官凡七年贈太師謚文憲

同直商輅歷兵部尚書兼學士

同直劉定之歷禮部左侍郎兼翰林院學士至成化五年八月卒於官贈禮部尚書謚文安

同直萬安四川眉山人進士以禮部左侍郎兼學士於成化五年五月入直

商輅自成化十一年三月爲元輔歷太子少保吏部尚書謹身殿大學士至成化十三年六月忤大監汪直加少保致仕凡二年四月卒於家贈太傅謚文毅

同直萬安加禮部尚書

同直劉珣山東壽光人進士以吏部左侍郎兼學士於成化十一年四月入閣十二年陞戶部尚書兼學士

同直劉吉直隸博野人進士以禮部左侍郎兼學士於成化十一年四月入直進禮部尚書

萬安自成化十三年六月爲元輔歷少師兼太子太師吏部尚書華蓋殿大學士至成化二十三年十月以人言好媚令致仕凡十年零五月卒於家贈太師謚文康

同直劉珣歷太子太保戶部尚書謹身殿大學士至成化二十二年九月令致仕卒謚文和

同直劉吉於成化十八年正月憂去七月起復歷少傅兼太子太師吏部尚書謹身殿大學士

國朝及明紀 卷之八 十三 三百九七
同直彭華江西安福人會元進士以詹事陞吏部左侍郎兼學士於成化二十二年十一月入直歷太子少保禮部尚書兼翰林院學士至成化二十三年二月以疾致仕卒於家贈太子少傅謚文思

同直尹直江西泰和人進士以戶部左侍郎兼學士於成化二十二年九月入直歷太子少保兵部尚書兼翰林院學士至成化二十三年十二月以人言令致仕卒於家謚文和

劉吉自成化二十三年十月爲元輔歷少師兼太子太師吏部尚書華益殿大學士至弘治五年八月以怙權令致仕凡五年卒於家贈太師謚文穆

同直徐溥直隸宜興人榜眼以吏部左侍郎兼學士於成化二十三年十月入直加至太子太傅戶部尚書武英殿大學士

同直劉健河南洛陽人進士以禮部右侍郎兼學士於成化二十三年十二月入直歷禮部尚書文淵閣大學士

同直丘濬廣東瓊山人進士以太子太保禮部尚書掌詹事府於弘治四年十月命兼文淵閣大學士入直

徐溥自弘治五年八月爲元輔歷少師兼太子太師吏部尚書華益殿大學士至弘治十一年十月以老乞致仕凡六年三月卒於家贈太傅謚文靖

同直劉健歷少傅兼太子太傅戶部尚書謹身殿大學士

同直丘濬歷少保兼太子太保戶部尚書武英殿大學士至弘治八年二月卒於官贈太傅謚文莊

同直李東陽湖廣茶陵人進士弘治八年二月以禮部右侍郎兼文淵閣大學士加太子太保禮部尚書

同直謝遷浙江餘姚人狀元以少詹事兼學士於弘治八年二月入直加太子少保兵部尚書兼東閣大學士

劉健自弘治十一年十月爲元輔歷少師兼太子太師吏部尚書華蓋殿大學士正德元年十月力主誅大監劉瑾被構害令致仕凡八年卒於家贈太師謚文靖

同直李東陽歷少傅兼太子太使戶部尚書謹身殿大學士

同直謝遷歷少傅兼太子太傅禮部尚書武英殿大學士至正

德元年十月同劉健被劉瑾構害致仕

李東陽自正德元年十月爲元輔歷少師兼太子太師吏部尚

書華蓋殿大學士正德七年十一月以年老乞致仕凡六年二

月卒贈太師謚文正

同直焦芳河南泌陽人進士以吏部尚書兼文淵閣大學士於

正德元年十月入直歷少師兼太子太師吏部尚書華蓋殿大

學士至正德五年五月致仕尋削籍爲民

同直王鏊直隸吳縣人會元探花以吏部左侍郎兼翰林院學

士於正德元年十月入直歷少傅兼太子太傅戶部尚書武英

國朝文獻通考 卷之八
殿大學士至正德四年四月見幾乞致仕卒於家贈太傅謚文恪

同直劉宇河南鈞州人進士以吏部尚書命兼文淵閣大學士於正德四年五月入直加少傅兼太子太傅至正德五年六月致仕尋削籍

同直楊廷和四川新都人進士正德二年十月以戶部尚書兼文淵閣大學士入直進少師吏部尚書兼華蓋殿大學士

同直曹元直隸舍山人進士以太子少保兵部尚書兼文淵閣大學士於正德四年五月入直至八月致仕尋削籍爲民

同直梁儲廣東順德人會元進士正德五年九月以吏部尚書

兼文淵閣大學士入直加少保

同直劉忠河南陳留人進士進吏部尚書兼文淵閣大學士於正德五年九月入直歷少傅兼太子太傅吏部尚書武英殿大學士至正德六年十一月以疾致仕卒於家贈太保謚文肅

同直費宏江西鉛山人狀元以禮部尚書兼文淵閣大學士於正德六年十二月入直

楊廷和自正德七年十一月爲元輔歷少師兼太子太師吏部尚書華蓋殿大學士至正德十年三月憂去凡二年五月同直梁儲

同直費宏進太子太保禮部尚書武英殿大學士至正德九年

國朝列傳卷之八
五月忤權倖錢寧致仕

同直靳貴直隸丹徒人探花以禮部尚書兼文淵閣大學士於
正德九年二月入直

梁儲自正德十年三月爲元輔歷少師兼太子太師吏部尚書
華蓋殿大學士至正德十二年十一月起楊廷和仍讓居首凡
二年零九月

同直靳貴歷太子太保戶部尚書武英殿大學士至正德十二
年四月以人言致仕卒於家贈太傅謚文僖

同直陽一清湖廣巴陵籍雲南安寧人進士以少傅兼太子太
傅吏部尚書兼武英殿大學士於正德十年閏四月入直至正

德十一年八月致仕

同直蔣冕廣西全州人進士以禮部尚書兼文淵閣大學士於
正德十一年八月入直

同直毛紀山東掖縣人進士以禮部尚書兼東閣大學士於正
德十二年五月入直

楊廷和自正德十二年十一月再起原官爲元輔至嘉靖二年
二月進太傅辭不拜十一月以議大禮忤旨致仕凡六年尋削
籍爲民

同直梁儲至正德十六年四月致仕卒於家贈太師謚文康
同直蔣冕 少傅兼太子太傅戶部尚書謹身殿大學士

同直毛紀 少保兼太子太保禮部尚書武英殿大學士

同直費宏於正德十六年四月起為少保兼原官仍入直

同直袁宗臯湖廣石首人進士以隨龍恩進禮部尚書兼文淵

閣大學士於正德十六年四月入直九月卒於官贈太子太保

謚榮襄

蔣冕自嘉靖二年十一月為元輔歷少傅兼太子太傅戶部尚

書謹身殿大學士至嘉靖三年六月致仕凡八月

同直毛紀歷少保兼太子太保吏部尚書謹身殿大學士至嘉

靖三年六月致仕卒於家贈太保謚文簡

同直費宏

費宏自嘉靖二年六月以少保吏部尚書謹身殿大學士為元

輔歷少師兼太子太師吏部尚書華蓋殿大學士至嘉靖六年

四月致仕凡三年

同直石瑤直隸藁城人進士以吏部尚書兼文淵閣大學士於

嘉靖二年六月入直屢少保兼太子太保吏部尚書武英殿大

學士至嘉靖六年二月致仕卒於家贈太保謚文隱

同直賈詠河南臨潁人進士以禮部尚書兼文淵閣大學士於

嘉靖三年八月入直

同直楊一清以原官於嘉靖四年十一月仍入直

同直席書四川遂寧人進士嘉靖六年 月進少保兼太子太

保禮部尚書兼武英殿大學士未任卒於官贈太傅謚文襄
楊一清自嘉靖六年四月為元輔歷少師兼太子太師吏部尚
書華蓋殿大學士至嘉靖八年九月致仕凡二年六月卒於家
贈太保謚文襄

同直賈詠歷少保兼太子太保禮部尚書武英殿大學士至嘉
靖六年八月致仕卒於家贈太保謚文靖

同直翟鑿山東諸城人進士以吏部左侍郎兼學士於嘉靖六
年四月入直七年陞禮部尚書兼文淵閣大學士

同直張璫浙江水嘉人進士以禮部尚書兼文淵閣大學士於
嘉靖六年八月入直歷少傅兼太子太傅吏部尚書謹身殿大

學士至八年八月致仕九月召還

同直謝遷嘉靖六年十月起原官戶部尚書謹身殿大學士至
七年四月致仕卒於家贈太傅謚文正

同直桂萼江西安仁人進士以少保兼太子太保吏部尚書命
兼武英殿大學士於嘉靖八年七月入直八月致仕九月召還

張璫自嘉靖八年九月為元輔九年改名孚敬至嘉靖十年閏
六月致仕凡一年十月

同直桂萼至嘉靖九年十二月致仕卒於家贈太傅謚文襄

同直翟鑿仍原官

同直方獻廣東南海人進士以少保兼太子太保吏部尚書

命兼武英殿大學士於嘉靖十一年六月入直

方獻夫自嘉靖十年閏六月爲元輔至嘉靖十一年二月起張孚敬仍讓居首凡九月

同直翟鑾仍原官

同直李時直隸任丘人進士於嘉靖十年九月以太子太傅禮部尚書兼武殿大學士入直

張孚敬自嘉靖十一年三月再起少傅入直爲元輔至本年八月彗見被人言致仕十二年正月三起爲元輔進少師兼太子太師吏部尚書華蓋殿大學士至嘉靖十四年四月致仕凡二年九月卒於家贈太師謚文忠

同直方獻夫仍原官至嘉靖十六年六月致仕卒於家贈太保謚文襄

同直李時原官

同直翟鑾原官兼武英殿大學士至嘉靖十二年憂去

費宏自嘉靖十四年四月三起原官爲元輔至嘉靖十五年十一月卒於官凡一年八月贈太保謚文憲

同直李時進至少傅

李時自嘉靖十五年十一月爲元輔歷少傅兼太子太師吏部尚書華蓋殿大學士嘉靖十七年十二月卒於官凡二年十月贈太傅謚文康

同直夏言江西貴溪人進士由少傅兼太子太傅禮部尚書命兼武英殿大學士於嘉靖十五年十二月入直

同直顧鼎臣直隸崑山人狀元以太子太保禮部尚書兼文淵閣大學士於嘉靖十七年八月入直

夏言自嘉靖十七年十二月爲元輔歷少師兼太子太師吏部尚書華蓋殿大學士至嘉靖二十一年七月以日食閑任凡三年八月

同直顧鼎臣歷少保兼太子太傅禮部尚書武英殿大學士至嘉靖十九年十月卒於官贈太保謚文康

同直翟鑾嘉靖十八年五月以輔臣起改兵部尚書兼右都御

史行邊十九年正月以太子太保禮部尚書兼武英殿大學士仍入直

翟鑾自嘉靖二十一年七月爲元輔歷少傅兼太子太傅禮部尚書謹身殿大學士至嘉靖二十三年八月以二子中進士被人言削籍爲民凡二年一月

同直嚴嵩江西分宜人進士以少保兼太子太保禮部尚書兼武英殿大學士於嘉靖二十一年八月入直

嚴嵩自嘉靖二十二年八月爲元輔進少傅至嘉靖二十四年十二月起夏言仍讓居首凡一年五月

同直許讚河南靈寶人進士以少保兼太子太傅吏部尚書命

歷朝列傳卷之八
三百八十三
兼文淵閣大學士於嘉靖二十三年八月入直加少傅至嘉靖二十四年十月乞致仕忤旨閑住後贈少師謚文簡

同直張壁湖廣石首人進士嘉靖二十三年八月以禮部尚書命兼東閣大學士入直加太子太保至嘉靖二十四年十月卒於官贈少保謚文簡

夏言自嘉靖二十四年十二月再起原官入直仍爲元輔至嘉靖二十七年正月主復河套落職致仕凡二年二月尋下獄死於西市

同直嚴嵩進少師

嚴嵩自嘉靖二十七年正月夏言得罪仍以少師兼太子太師

吏部尚書華蓋殿大學士爲元輔至嘉靖四十一年五月以子擅權納賄令致仕凡十四年五月削籍爲民籍沒家產

同直張治湖廣茶陵人會元進士以禮部尚書兼文淵閣大學士於嘉靖二十八年二月入直加太子太保至嘉靖二十九年十月卒於官贈少保謚文隱後改謚文毅

同直李木浙江餘姚人進士於嘉靖二十八年三月以少詹事兼翰林院學士入直歷少傅兼太子太傅戶部尚書武英殿大學士至嘉靖四十年五月憂去

同直徐階直隸華亭人探花以少保禮部尚書兼東閣大學士於嘉靖三十一年二月入直

同直袁煒浙江慈谿人會元探花以太子少保禮部尚書兼學士於嘉靖四十年 月入直

徐階自嘉靖四十一年五月爲元輔歷少師兼太子太師吏部尚書建極殿大學士至隆慶二年七月致仕凡六年三月

同直袁煒歷少傅兼太子太傅戶部尚書建極殿大學士至嘉靖四十四年二月以病致仕卒於途謚文榮

同直嚴訥直隸常熟人進士以太子太保吏部尚書命兼武英殿大學士於嘉靖四十四年 月入直至嘉靖四十五年 月

養病去

同直李春芳直隸興化人狀元以太子太保禮部尚書命兼武

英殿大學士於嘉靖四十四年 月入直

同直郭朴河南安陽人進士以太子少保吏部尚書兼學士於

嘉靖四十五年 月入直歷少傅兼太子太傅吏部尚書武英殿大學士至隆慶元年 月養病

同直高拱河南新鄭人進士以禮部尚書兼學士於嘉靖四十五年 月入直進少傅兼太子太傅禮部尚書武英殿大學士

至隆慶元年 月養病

同直陳以勤四川南充人進士以禮部尚書兼學士於隆慶元年 月入直

同直張居正湖廣江陵人進士以吏部左侍郎兼學士於隆慶

元年 月入直

李春芳自隆慶二年七月為元輔歷少師兼太子太師吏部尚

書中極殿大學士至隆慶五年 月致仕凡二年 月

同直陳以勤歷少傅兼太子太傅禮部尚書武英殿大學士至

隆慶四年 月養病

同直張居正

同直趙貞吉四川內江人進士以禮部尚書兼學士於隆慶三

年 月入直加太子太保禮部尚書兼文淵閣大學士掌都察

院事至隆慶四年 月致仕

同直高拱復原官於隆慶四年 月仍入直掌吏部事

同直殷士儋山東歷城人進士以太子太保禮部尚書兼文淵

閣大學士於隆慶四年 月入直進少保兼太子太保禮部尚

書武英殿大學士至隆慶五年 月致仕

高拱自隆慶五年 月以少師兼太子太師吏部尚書中極殿

大學士為元輔仍掌吏部事至隆慶六年六月奉旨致仕凡

年三月

同直張居正

張居正自隆慶六年六月以少師兼太子太師吏部尚書中極

殿大學士為元輔至萬曆十年六月卒於官以專權削籍抄沒

凡十一年

國朝文苑英華 卷之八
同直高儀浙江錢塘人進士以太子太保禮部尚書兼文淵閣
大學士於隆慶六年六月入直至 月卒於官贈太子太保謚
文端

同直呂調陽廣西臨桂人榜眼以禮部尚書兼文淵閣大學士
於隆慶六年 月入直歷少傅兼太子太傅吏部尚書建極殿
大學士至萬曆六年 月致仕

同直張四維山西蒲州人進士以禮部尚書兼東閣大學士於
萬曆二年八月入直

同直馬自強陝西同州人進士以太子太保禮部尚書兼文淵
閣大學士於萬曆六年三月入直至本年 月卒於官贈少保

謚文莊

同直申時行直隸吳縣人狀元以吏部左侍郎兼東閣大學士
於萬曆六年三月入直

張四維自萬曆十年六月以少傅兼太子太師禮部尚書武英
殿大學士爲元輔九月加少師兼太子太師吏部尚書中極殿
大學士至萬曆十一年四月以憂去凡十月十三年十月卒於
家贈太師謚文毅

同直申時行

同直余有丁浙江鄞縣人探花萬曆十年六月以禮部尚書兼
文淵閣大學士入直

申時行自萬曆十一年四月爲元輔歷少師兼太子太師吏部尚書中極殿大學士至十九年九月

同直余有丁歷少傅兼太子太傅戶部尚書建極殿大學士萬曆十二年十一月卒於官贈太保謚文敏

同直許國直隸歙縣人進士萬曆十一年 月以禮部尚書兼東閣大學士入直歷少傅兼太子太師吏部尚書建極殿大學士萬曆十九年九月致仕

同直王家屏山西山陰人進士萬曆十二年 月以吏部左侍郎兼東閣大學士入直至十 年 月以憂去十六年十二月以禮部尚書兼東閣復入

同直王錫爵直隸太倉人榜眼萬曆十三年 月以禮部尚書兼文淵閣大學士入直歷太子太保禮部尚書武英殿大學士十九年六月給假省親

按內閣政本之地而輔成聖德扶持國是使君子道亨則元輔
實司之成我文皇以上聖之資恢無前之業崇性學以興文
教犁虜庭以飭武功諸所設施動與天合解縉胡廣楊榮輩不
過仰贊其成而已然終永樂之世閣臣官止五品亦不得專制
諸司事於此仰窺聖謨神算爲萬世慮深且遠也楊士奇贊
政二十餘年上守祖訓下軫民瘼凡事以正道倡之而楊榮
楊溥亦協心一德故洪熙宣德及正統初海內奠安號稱太平
及曹鼐等才器尋常不能抗王振之橫恣致有土木之變豈能
逭其責與陳循立景泰之朝依阿苟祿不秉大義以自裁坐視
易儲貪受官賞及子不中式甘同正文構陷考官志滿釁生而

竄戍邊陲不亦宜乎天順復辟徐有貞以奪門功掌閣事然始與曹石同事而欲矯枉於後所以有金齒之謫也李賢既斥復留最專且久密勿帷幄於曹石弊政反革幾盡可謂有救時之功矣陳文以貪賄致譏不足云也彭時商輅奉法守成於事關綱常露章抗論如彭之沮太監劉永昌封伯商之劾太監汪直設西廠害人其大節不足尚乎萬安素行邪佞結萬通輩爲奧援久溷台司及孝皇斥逐猶望台星冀復用何恥如之劉吉以陰刻與萬安同事萬去猶納款科道苟留時六部得人如王恕忠鯁屢爲其忤怪不得行其志有損弘治初政不少徐溥以寬厚稱劉健以端靖稱遭逢孝皇勵精圖治將大有爲而隨

事將順無以充拓德意清釐內府積弊亦坐失良期矣正德初逆豎劉瑾等導上遊逸廢棄萬機劉健倡九卿科道請劔行誅反罹竄逐將衣冠之禍有數存乎劉與謝遷去國李東陽獨留時有中立之譏然逆瑾竊柄引焦芳劉宇曹元厠禁扉變亂成憲桎梏臣工天下岌岌然而東陽以元老調護其間使國脉不至盡斬其功不可泯也楊廷和梁儲處濁亂之世內有義子朱寧江彬等與奄豎張忠輩表裏爲奸跋扈不恭外有江西四川之巨盜搖吻平民而志存裕蠱才亦足以應變卒之叛藩驕帥相繼殄除非天啓世宗中興者歟初勅下議尊本生廷和與蔣冕拘泥舊聞不能申上罔極之恩固失之矣而嘉靖

改元一詔盡洗正德敝政爲天下所傳誦可泯沒之乎禮嘗莊
誦嘉靖四十五年間仰窺世宗聖神天授獨秉乾綱嚴束中
官悚惕不敢與政紀又裁革天下鎮守除累朝所欲除而未能
者可謂千載一時矣前後輔臣有才可用者任之不疑及以罪
聞者量罪大小或致仕或削籍或議死或籍產赫然如雷霆在
上孰有能逃於明照者乎大抵輔臣之職不過代言備顧問
雖文淵閣有印止於封進詔草登答章疏用之不得下諸司自
居此任者無丞相之名陰竊其實擅權自專使部院稟受而後
行是不惟悖太祖之訓亦失成祖設內閣之本意矣今
聖祚無疆與天地同其悠久後之視今猶今之視昔也膺輔臣之
任者其尚知所以永鑒哉

國朝列卿紀卷之八終

